



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • DVOBROJ: 40 i 41 • MJESEC: APRIL/TRAVANJ 2013. • BILTEN JE BESPLATAN • TIRAŽ 500



Porodično stablo dinastije Kotromanića

SADRŽAJ

- 2 Obilježen 25. novembar, Dan državnosti BiH
- 3 45. sjednica OV-a Srebrenik
- 4 46. sjednica i konstituirajuća sjednica OV-a Srebrenik
- 5 2. i 3. sjednica OV-a Srebrenik
- 6 Izvještaj sa vanredne sjednice OV-a Srebrenik
- 7 Potpredsjednik FBiH i premijer Vlade TK-a, sa saradnicima, posjetili općinu Srebrenik
- 8 Đački krediti i stipendije; Bespovratna sredstva kor. BiZ-a
- 9 Ugovor o izgradnji nove zgrade općine Srebrenik; Otvorena apoteka u Podorašju
- 10 Zvanično u pogon puštena nova kotlovnica
- 11 Otvoren Centar za djecu sa posebnim potrebama
- 12 Elektronski registar administrativnih procedura; Sastanak sa ambasadorom KSA u BiH
- 13 Sastanci načelnika sa raznim udruženjima građana
- 14 Predstavljamo nove vijećnike
- 15 Predstavljamo nove vijećnike
- 16 Uskoro Povelja o bratimljenju
- 17 Predstavници Hilfsverka i Roma te SGV-a TK-a posjetili općinu Srebrenik; Konak Suljagića na listi nacionalnih spomenika
- 18 Vjerske aktivnosti tokom katoličkog i pravoslavnog Božića
- 19 Izložba levhi i promocija knjiga Omera Ibrahimagića te Kemala Tursunovića
- 20 Mladi Eko lideri i koncert „Pečat u srcu“
- 21 Promocija UM „Zefir“ Srebrenik; 13. godina GTS-a; Dječiji festival zabavne muzike 2012
- 22 Promovisana knjiga „Život mladosti“ Muje Bjelića; Dani povelje 2013
- 23 Izvještaj sa Dana povelje 2013
- 24 Izvještaj sa Dana povelje 2013
- 25 Izvještaj sa Dana povelje 2013
- 26 Izvještaj sa Dana povelje 2013
- 27 Renoviran Gradski stadion; In memoriam: Hašim dr. Muharemović
- 28 Hadžić Mineli srebro na Svjetskom prvenstvu; Aksemtu Božićni malonogometni turnir; Minela Hadžić i Ishak Hasić sportisti općine Srebrenik u 2012.g.



Data je počast i ispred Centralnog spomen-obilježja

Na svečan način obilježen 25. novembar, Dan državnosti BiH

Svečanom sjednicom Općinskog vijeća i svih boračkih organizacija, u Srebreniku je, na svečan način, obilježen 25. novembar, Dan državnosti BiH. Predstavници izvršne i zakonodavne vlasti općine Srebrenik i TK-a, premijer Vlade TK Sead Čaušević sa ministrima u Vladi TK-a, predstavnici političkih partija, boračkih udruženja i



Počast su dali i predstavnici svih boračkih udruženja

vjerskih zajednica su proučili fatihu, minutom ćutnje ili na drugi prigodan način te polaganjem cvijeća na Centralno spomen-obilježje i na Spomen-kosturnicu odali počast poginulim borcima i šehidima minulog rata kao i poginulim borcima NOR-a iz Drugog svjetskog rata. Svečanu sjednicu otvorila je predsjedavajuća OV-a Srebrenik Veselčić Vesna, nakon čega je referat u povodu Dana državnosti BiH pročitao načelnik općine Srebrenik, Sanel Buljubašić, koji je podsjetio na davnu historiju Bosne, na „dobre Bošnjane“ koji su u teškim vremenima uspjeli očuvati svoj identitet tj. svoj jezik, kulturu, bogumilsku vjeru. Dan državnosti BiH je praznik koji se, i pored osporavanja, obilježava u većem dijelu BiH, svakog 25. novembra. Na taj dan 1943. godine, na prvom



Detalj sa svečane sjednice

zasjedanju ZAVNOBiH-a u Mrkonjić Gradu su udareni moderni temelji državnosti Bosne i Hercegovine, kao ravnopravne republike unutar jugoslavenske federacije, sa historijskim granicama koje su datirale još iz vremena srednjovjekovne Bosne. U nastavku govora je između ostalog kazao: -U nedjelju se obilježava 69.-godišnjica Prvog zasjedanja ZAVNOBiH-a. Tada je obnovljena državnost BiH, koja je 1463 g. prestala da postoji padom Bosanskog kraljevstva pod osmansku vlast. Tada su 173 predstavnika, sva tri bh naroda, odlučili da njihova zemlja "koja nije ni srpska, ni hrvatska ni muslimanska, nego i srpska i muslimanska i hrvatska budu slobodna i zbratimljena Bosna i Hercegovina, u kojoj će biti osigurana ravnopravnost i jednakost svih. Dakle, ako je Povelja Kulina bana 1189 godine "rodni list" Bosne i Hercegovine, onda je ZAVNOBiH matični dokument njene državnosti. Državnost BiH je starija od njenih naroda, jer se država BiH konstituirala prije nego što su se konstituirali njeni narodi! " Iako je bio pripremljen bogat kulturno-umjetnički program isti nije održan zbog dana žalosti, koji je proglašen zbog tragične pogibije trojice mladića iz Srebrenika u saobraćaju.

Izvještaj sa 45. sjednice OV-a Srebrenik

Na 45. sjednici OV-a Srebrenik održanoj 06.09.2012.g., zbog obimnog Dnevnog reda, odlučeno je da se raspravlja samo o prvih deset tačaka, dok će se o preostalim tačkama raspravljati u srijedu 12.09.2012. godine. Najveću raspravu izazvao je Izvještaj o izvršenju budžeta za prvih šest mjeseci ove godine, koji je u deficitu blizu milion maraka. Načelnik Mehmed Bajrektarević je pojasnio da se to desilo prvenstveno zbog smanjenog priliva sredstava sa viših nivoa vlasti kao i smanjenom interesu za izgradnju, te jednoj ukupno lošoj ekonomskoj situaciji u BiH. Mnogo zanimanja izazvala je i tačka koja se odnosi na projekat toplifikacije u gradu Srebreniku, gdje je ovaj posao privremeno povjeren JP „9. septembar“ Srebrenik. U nastavku sjednice istaknuto je da će se kotlovi zagrijavati na bio-masu i da će cijena biti 0,098 KM/kWh bez PDV po metru kvadratnom, te da je to, u odnosu na okruženje, jedno od povoljnijih daljinskih grijanja, a zbog brojnih žalbi koje su značajno usporile ovaj proces, izvjesno je da će ove zime na daljinsko grijanje biti priključene samo „Prva osnovna škola“, „Mješovita srednja ško-



Detalj sa 45. sjednice Općinskog vijeća Srebrenik

la“ i „Dom zdravlja“. Priključak ostalih objekata je upitan s obzirom na žalbe koje su uslijedile nakon raspisivanje tendera za izgradnju toplovođa koji bi trebali voditi do drugih objekata. Vijećnici su prihvatili Prijedlog Odluke o bratimljenju Općine Srebrenik sa turskom općinom Edremit u Izmiru, koja bi trebala donijeti dosta toga dobrog ovom općinskom području u narednom

periodu. Na sjednici je prihvaćena i Odluka da se MZ Brnjičani da pravo građenja na zemljištu u državnoj svojini, dok je Općina preuzela dug MZ Tinja Gornja u iznosu od 30.320 KM prema firmi „Reweus“ d.o.o. Lukavac za izvođenje infrastrukturnih radova u proteklom periodu. Također, usvojen je i Nacrt odluke o izmjenama regulacionog plana za MP Tinja.

Izvještaj sa nastavka 45. sjednice OV-a Srebrenik

Dana 12.09.2012.godine, u Plavoj sali Doma kulture, održan je nastavak 45. sjednice OV-a Srebrenik. Na ovoj sjednici OV Srebrenik, predstavnici zakonodavne vlasti usvojili su prijedlog da Općina preuzme dug od MZ Murati u visini od 63.497 KM prema izvođaču radova d.o.o. „Zvornik-putevi“. Prihvaćene su i izmjene Odluke o realizaciji Projekta uvođenja dodatnih količina vode u vodovodne sisteme Ljenobud i Kuge, gdje će Općina u projektu vrijednom 481.924 KM učestvovati sa 408.336 KM a MZ Ljenobud sa 73.587 KM, a također prihvaćeno je i da se ovaj novoizgrađeni vodovodni sistem preda na upravljanje JP „Vodovod i kanalizacija“ Srebrenik. Prihvaćene su izmjene i dopune uređenja gradskog građevinskog zemljišta za 2012.godinu, a koje se odnose na projekat toplifikacije (521.847 KM) i uređenje gradskog poligona (28.153 KM), dok je usvojen i Prijedlog odluke o preuzimanju prava i obaveza osnivača i usklađivanja organizacije i poslovanja JZU „Dom zdravlja“ Srebrenik. Vijećnici su također prihvatili i Prijedlog odluke da je od javnog interesa izgradnja puta u MZ Jasenica, kao i Informaciju o aktivnostima na izgradnji „Gradskog stadiona“ i stvaranja minimalnih uslova za dobivanje licence za odigravanje premijerligaških utakmica O.F.K. „Gradina“ u Srebreniku. Ukupna investicija za ovu svrhu za zapadnu tribinu iznosi 411.000 KM dok je za sanaciju istočne tribine potrebno 40.000 KM, što čini sve ukupno 451.000 KM. Ovom Odlukom načelniku je dato ovlaštenje da može raspisati tender za izgradnju zapadne i sanaciju istočne tribine, tako što će se rebalansom budžeta izdvojiti 50.000 KM u 2012.godini, a da se preostali dio plati u 2013.godini i to u četiri jednake rate. Takođe, aplicirat će se za ovaj projekat i kod viših nivoa vlasti kako bi se što lakše zatvorila ova finansijska konstrukcija, obzirom na nedostatak vlastitih novčanih sredstava. Usvojen je i Prijedlog Odluke o imenovanju Upravnog odbora JZU



Detalj sa nastavka 45. sjednice OV-a Srebrenik

„Gradska apoteka“ gdje je za predsjednika upravnog odbora, ispred osnivača, imenovan Nuraga Junuzović, za člana dr. Ešref Harčinović dok je iz reda uposlenika u upravni odbor imenovana Azra Suljagić, magistar farmacije. Bez većih rasprava usvojena su i rješenja u korist graditelja zgrade Džemala Kešetovića iz N.N. Luka, te Zaključak kojim se daje saglasnost Velagić Jusufu iz Srebrenika za otuđenje nedovršenog objekta kao i rješenje da se od ranijeg vlasnika Željeznice FBiH preuzima neizgrađeno gradsko građevinsko zemljište.

Izvještaj sa 46. vanredne sjednice OV-a Srebrenik

Dana 12.09.2012.godine U Plavoj sali Doma kulture u Srebreniku održana je vanredna 46. sjednica OV-a Srebrenik na kojoj je razmatrana samo jedna tačka dnevnog reda: Odluka o izmjenama i dopunama Odluke o administrativnim taksama i Tarifama općinskih administrativnih taksi. U uvodnom izlaganju načelnik Mehmed Bajrektarević je vijećnike upoznao da su Općina Srebrenik i Međunarodna finansijska korporacija iz Grupa Svjetske banke (International Finance Corporation- IFC) dana 12.12.2011. godine zaključili Sporazum o saradnji u okviru „Projekta poboljšanja poslovnog okruženja i konkurentnosti u BiH“. Potpisivanjem ovoga Sporazuma Općina Srebrenik se obavezala na sprovođenje regulatorne racionalizacije propisa na lokalnom nivou, te u potpunosti prihvatila obavezu da implementira ovaj Projekat. Konačni cilj Projekta je uspostavljanje elektronskog Registra svih administrativnih postupaka i obrazaca u nadležnosti Općine Srebrenik. Svrha elektronskog Registra je da obezbijedi pravnu sigurnost pravnim i fizičkim licima i pojednostavi

njihovo poslovanje. U proteklom periodu izvršena je identifikacija i analiza 141-og administrativnog postupka, te su na radnim tijelima usvojene neke izmjene kako u skraćenju vremena rješavanja administrativnih postupaka, što je već usvojio općinski načelnik, tako i u izmjeni i dopuni određenih općinskih taksi. Osim navedenog razloga izvršeno je usklađivanje Odluke i sa izmjenama i dopunama zakonskih propisa vezanih za uklanjanje minimalno-tehničkih uslova u Zakonu o unutrašnjoj trgovini, Zakonu o obrtu i srodnim djelatnostima te izmijenjene nomenklature djelatnosti u Zakonu o ugostiteljskoj djelatnosti. – „Općina Srebrenik je pri kraju implementacije „Projekta poboljšanja poslovnog okruženja i konkurentnosti u BiH“. Nakon što su predstavnici IFC-a održali sastanke sa državnim službenicima, šefovima Službi, predstavnicima civilnog društva i privrednicima sa našeg općinskog područja, te nakon napravljene analize i poređenja cijena pojedinih usluga u našoj općini i drugim susjednim i ostalim referentnim općinama, utvrđeno je da, u cilju

poboljšanja konkurentnosti i stvaranja povoljnijeg poslovnog ambijenta, kao i u cilju usklađivanja Odluke sa izmjenama i dopunama gorenavedениh zakonskih propisa, postoji opravdana potreba za smanjenjem dijela općinskih taksi te se predlaže OV-u Srebrenik na usvajanje visine taksi koje su navedene u prezentiranoj Odluci. S obzirom na to da je prezentacija elektronskog registra Općine Srebrenik zakazana za 05.10.2012. godine neophodno je da se pomenuta Odluka razmatra i usvoji, kako bismo ispoštovali rokove vezane za realizaciju preostalih projektnih aktivnosti, a uskoro slijedi i usvajanje novih smanjenja taksi i tarifa -istakao je Nedim Mujčinović, koordinator navedenog projekta ispred općine Srebrenik. U nastavku sjednice predsjednici klubova vijećnika svih stranaka su podržali navedeni projekat te pohvalili samu ideju da se smanjenjem dijela taksi i rokova rješavanja administrativnih postupaka pomogne građanima i privrednicima, nakon čega je Odluka i usvojena jednoglasno.

U Srebreniku konstituisano novo Općinsko vijeće. Predsjedavajuća OV-a Veselčić Vesna iz HDZ-a



Veselčić Vesna, predsjedavajuća OV-a Srebrenik

Dana 21.11.2012.godine, u Plavoj sali Doma kulture u Srebreniku, održana je 1. (konstituirajuća) sjednica novog saziva Općinskog vijeća (OV-a) Srebrenik. Podnesen je Izvještaj Centralne izborne komisije BiH o ovjeri mandata osobama koje su dobile vijećnički mandat, nakon čega su novoizabrani vijećnici položili svečanu zakletvu. Za predsjedavajuću OV-a Srebrenik izabrana je Veselčić Vesna

iz HDZ-a Srebrenik, dok je njen zamjenik u OV-u Srebrenik Suljić Zihir iz SDP-a. Općinsko vijeće u Srebreniku u naredne četiri godine činit će kandidati iz osam političkih stranaka. Deset mandata, što je ujedno i najviše, osvojila je SDA (**Zukić Ibrahim, Babajić Damir, Fazlić Adis, Zukić Fahir, Brašnjić Jasmin, Tursić Nermin, Kulović Nihad, Omerović Safet, Dedić Raif i Okić Nermin**), sedam vijećnika dolazi iz SDP BiH (**Suljić Zihir, Muratović Mustafa, Jašarević Suad, Imširović Azra, Suljić Sejfudin, Omerović Helena i Zahirović Izudin**). Po dva vijećnička mjesta osvojili su kandidati iz SBB-a (**Buljubašić Hasib i Ibrisić Omer**), BPS Sefer Halilović (**Salihović Ibrahim i Sarajlić Mehmedalija**), Stranke za BiH (**Mutapčić Edin i Hasić Jusuf**), LDS - Liberalno demokratske stranke BiH (**Husarić Amir i Morankić Rifat**), Narodne stranke Radom za boljitak (**Ordagić Mirza i Ordagić Muhamed**), dok je jedno vijećničko mjesto osvojio HDZ (**Veselčić Vesna**). Iz reda nacionalnih manjina u OV-e Srebrenik izabran je **Bafćari Alen**, kandidat predložen ispred SDP-a. Zbog povreda zadobijenih u saobraćajnom udesu konstituirajućoj sjednici nije prisustvovao Muratović Mustafa, vijećnik SDP-a, kojem su kolege zaželele uspješan oporavak, dok je na početku kratkog obraćanja načelnika Buljubašić Sanela, u kojem je najavio nastavak korektnog odnosa izvršne i zakonodavne vlasti, učenjem fatihe, minutom ćutnje ili na drugi prigodan način odata počast trojici mladića iz Srebrenika, koji su prethodne noći u saobraćajnom udesu izgubili život, a među njima je i sestrčić općinskog vijećnika Kulović Nihada. Po zaključku OV-a Srebrenik, općinski načelnik Sanel Buljubašić donio je Odluku o proglašenju dana žalosti na području naše Općine i to na dan dženaze ovih mladića, koja bi se trebala održati narednog dana. Predsjednik Općinske izborne komisije i sekretar OV-a Srebrenik, Sakib Ibračević naglasio je da su Lokalni izbori na području općine Srebrenik provedeni uspješno, a potvrde za to dolaze od građana, političkih stranaka, nevladinih organizacija i vijećnika.

Izvještaj sa 2. sjednice Općinskog vijeća Srebrenik

Na 2. sjednici OV-a Srebrenik, koja je održana 18.12.2012.g., zbog obimnih diskusija i rasprava, zaključeno je svega osam od petnaest tačaka predviđenih dnevnim redom, te će se o preostalim tačkama vijećnici izjašnjavati na narednoj sjednici. Najviše zanimanja vijećnika izazvala je tačka vezana za stanje budžeta općine Srebrenik za 2012.g., koje je načelnik Sanel Buljubašić ocijenio jako teškim, objašnjavajući kako će prevazići problem prispjelih obaveza prema privrednim subjektima, ali da mu najveći problem predstavljaju tekuće obaveze, te da je punjenje budžeta jako slabo. Podcrtano je kako je budžet u deficitu za prvih 9 mjeseci više od 1.800.000 KM, zbog čega će se na narednoj sjednici uraditi rebalans budžeta, a načelnik je najavio za 2013. g. veće mjere štednje kako bi se stabilizovao budžet. Dosta zanimanja izazvao je i nacrt Programa obavljanja zajedničke komunalne potrošnje, gdje su planirana sredstva na istom nivou, kao i prošle godine. Pojedini vijećnici su predlagali da se prvo utvrdi je li JKP „9. septembar“ dovoljno opremljeno i sposobno da obavlja sve predviđene usluge, te da se trebaju utvrditi validni kriteriji vrednovanja urađenog. Na taj način ako firma koja dobije posao ne odradi sve korektno, po obimu i kvaliteti posla, da bude kažnjena za to, a ne da dobija sredstva unaprijed, bez obzira kako obavlja ove usluge. Primjedbi je bilo i na postojanje velikog broja „divljih deponija“, dok su pojedini vijećnici predlagali da se o ovoj tački ne raspravlja sve dok se ne dobije informacija o onome što je urađeno u prethodnoj godini po ovom pitanju. Direktor JKP „9. septembar“ Srebrenik Zaim Djedović priznao je kako su gradske ulice ove zime bile slabije očišćene, pravdajući to time što JKP „9. septembar“ čisti više od 330 km puteva na našem općinskom području, te da jednostavno kapacitetom nisu mogli odgovoriti potrebama, posebno tražeći da se, obzirom da u značajnoj mjeri rade i te poslove, preciziraju i stavke vezane za održavanje Gradskog stadiona, korita rijeke Tinje kao i kafilerijskih poslova. Jedno od važnijih pitanja je i problem odlaganja komunalnog otpada na postojećoj deponiji u Babunovićima, gdje mještani ponovno prijete blokadom,



Detalj sa 2. sjednice Općinskog vijeća Srebrenik

zbog čega je i određena komisija u sastavu: Ibro Salihović, Zihir Suljić, Mirza Ordagić i Adis Fazlić koja će, zajedno sa načelnikom, pokušati da sa mještanima Babunovića dogovori nastavak odlaganja otpada te eventualno iznalaženje nove lokacije. Usvojen je i Program utroška sredstava za novčane podrške u primarnoj poljoprivrednoj proizvodnji utvrđenih budžetom za 2012. g., gdje je zbog slabijeg punjenja budžeta ova stavka umanjena sa 35.000 KM na 28.000 KM. Za JNP za uginuće stoke izdvojeno je 8.000 KM, za podršku pčelarima 13.372 KM te za pomoć u saniranju šteta od prirodnih nepogoda 6.628 KM. Formirane su i 2 općinske komisije, a u Komisiju za statutarno-pravna pitanja imenovani su: Muharem Bajrektarević kao predsjednik te Edis Kavgić, Mirela Mešić, Fatima Škahić i Nihad Mehmedović kao članovi, dok su u Komisiju za budžet i ekonomski razvoj imenovani Selmir Zukić kao predsjednik te Elvis Husić i Alma Popara kao članovi. Na nacrt Odluke o određivanju matičnih područja i vođenju jedinstvenih matičnih knjiga bilo je niz primjedbi, s obzirom da je istom predviđeno 49 naselja dok općina Srebrenik ima 51 MZ-u, te će do konačnog usvajanja pretrpjeti određene korekcije. U usvojenoj Informaciji o dostavi vode za piće stanovnicima ugroženih naselja putem cisterni u 2012.g., navedeno je kako se za ove potrebe utrošilo 185.000 KM za nabavku i prevoz vode za brojna ugrožena naselja na području općine Srebrenik.

Planirani budžet za 2013. godinu 9.792.000 KM

Na nastavljenoj 2. sjednici OV-a Srebrenik, koja je održana 28.12.2012.g., usvojene su informacije o realizaciji dopunskih prava iz oblasti boračke populacije u nadležnosti općine Srebrenik za prvih 9. mjeseci 2012.g., kao i informacije o uspjehu učenika kako osnovnih tako i „MSŠ“ Srebrenik. Vijećnici su prihvatili inicijativu načelnika općine Srebrenik Sanela Buljubašića da formira Komisiju za pregovore sa Vladom TK-a u vezi sa reorganizacijom Fabrike obuće „Aida“, da se ovom pogonu u Dubokom Potoku pomogne u nabavci ogreva, dok je prigovor „SDA“ na odluku o utvrđivanju broja mandata u vijećima MZ-a odbijen. Odmah nakon ove sjednice uslijedila je 3. sjednica OV-a Srebrenik, na kojoj je usvojen rebalans budžeta za 2012. g., kojim je budžet umanjen sa planiranih 12.302.821 KM na 11.377.021 KM. Vijećnici su dali saglasnost načelniku da se Općina može zadužiti kod NLB banke u iznosu od 300.000 KM kako bi održala likvidnost budžeta, a prihvaćen je i Prijedlog odluke o privremenom finansiranju za period januar-mart 2012. g. Usvojen je i Nacrt odluke o budžetu općine Srebrenik kao i o njegovom izvršenju za 2013. g., koji je planiran u visini od 9.792.000 KM. Načelnik Buljubašić najavio je budžet za 2013.g. kao stabilizirajući budžet, s obzirom na značajna ranija zaduženja za razne infrastrukturne projekte te ekonomsku krizu, koja utiče na lošije punjenje budžeta. U infrastrukturu na području općine Srebrenik u narednoj godini trebalo bi se investirati 2.690.000 KM, a akcenat će biti na vodosnadbijevanju, deponiji otpada te toplifikaciji, dok je prihvaćen i nacrt Programa uređenja gradskog građevinskog zemljišta u šta bi se trebalo investirati 1.150.000 KM. Prihvaćen je i Prijedlog odluke o organizovanju i funkcionisanju zaštite od požara i vatrogastvu, zatim Odluka o određivanju matičnih područja te vođenju jedinstvenih matičnih knjiga, Program obavljanja



Detalj sa 3. sjednice OV-a Srebrenik

usluga zajedničke komunalne potrošnje za 2013. g. kao i Program utroška sredstava za poljoprivredu u 2012. g. U formi nacrtu su usvojene Odluka o utvrđivanju prosječne konačne građevinske cijene metra kvadratne površine koja je umanjena sa 920 KM na 850 KM te Odluka o Izmjenama i dopunama odluke o administrativnim taksama i tarifi općinskih administrativnih taksi koje su umanjene u dijelu građevinskih taksi za stambeno-poslovne i poslovne objekte. Usvojen je i Prijedlog Odluke o davanju saglasnosti d.o.o. „OS Petrol“ za otuđenje nedovršenog poslovnog objekta, kao i zakazivanje tematske sjednice OV-a Srebrenik u vezi sa sudsom presudom dvojici građana općine Srebrenik za navodno počinjene ratne zločine kao i zbog informacije o pokretanju krivične prijave protiv osam pripadnika TO Srebrenik, pripadnika vojne i civilne vlasti općine Srebrenik u periodu 1992 – 1995. g., za navodni ratni zločin, koju je saopštio Sinan Alić, predsjednik Fondacije „Istina, pravda, pomirenje“ iz Tuzle na press konferenciji. OV-e osuđuje subjektivni nastup predsjednika Alića, koji se u svom nastupu stavio u funkciju sudske vlasti i unaprijed osudio osobe protiv kojih je podnesena krivična prijava od strane „njegove“ Fondacije, riječima, da direktni izvršioци ratnih zločina slobodno šetaju Srebrenikom.

Izvještaj sa vanredne sjednice OV-a Srebrenik



Detalj sa vanredne sjednice OV-a Srebrenik

Dana 05.01.2013.g., na vanredovnoj tematskoj sjednici, Općinsko vijeće općine Srebrenik, jednoglasno je usvojilo Zaključke u vezi pokretanja krivične prijave od strane Fondacije "Istina, pravda, pomirenje" iz Tuzle, protiv pripadnika vojne i civilne vlasti općine Srebrenik u periodu 1992 – 1995. g. Vijećnici SDA su tražili da se o pripremljenom tekstu Zaključaka raspravlja, ali je većina u Općinskom vijeću bila protiv toga, smatrajući da je sadržaj Zaključaka sasvim dovoljan u smislu davanja podrške našim predstavnicima civilne i vojne vlasti, koji su optuženi za „navodne ratne zločine“, te da se o istom treba samo glasati. Na kraju su vijećnici ipak prihvatili dopunu Zaključaka sa jednom dodatnom tačkom, koju je podnio vijećnik SDA Raif Dedić, te su na kraju vijećnici, nakon što je iste pročitala predsjedavajuća OV-a Vesna Veselčić, usvojili sljedeće

Zaključke:

- 1.Općinsko vijeće općine Srebrenik najoštrije osuđuje izjave kojima se pretenciozno i netačno informiše javnost o ratnoj istini za opstanak svih naroda na području općine Srebrenik, iznesene u medijima 27.12.2012.godine, od strane Fondacije "Istina, pravda, pomirenje" iz Tuzle.
- 2.Područje općine Srebrenik je bio prostor na kojem su počinjeni zločini od strane agresorske vojske kao što su: ubistvo tri i ranjavanje jednog pripadnika sanitetskog osoblja juna mjeseca 1992. godine u naselju Potpeć; ubistvo 11 i ranjavanje 17 civila u zimu 1993.godine od agresorske granate, ispaljene na centar grada. Radi se centru grada, koji je daleko od fronta i stradanju isključivo civila, dok su mete bile isključivo civilni ciljevi. Za ove zločine do sada još niko nije odgovarao.
- 3.Općina Srebrenik je čitavo vrijeme rata bila mjesto za primjer suživota. Preko 17000 izbjeglih i prognanih je zbrinula i obezbijedila miran život svih njenih građana, bez obzira na vjeru, naciju ili rasu. S posebnom pažnjom su se civilna vlast i vojne strukture odnosile prema građanima srpske nacionalnosti, što mnogi od njih, koji i danas žive ovdje, to mogu da posvjedoče. To su činjenice i ništa ih nemože promijeniti.
- 4.Polazeći od načela da „niko nije kriv dok sud to ne potvrdi“, Općinsko vijeće pruža i pružat će podršku svim našim sugrađanima koji budu procesuirani za „navodne ratne zločine“, među koje ubrajamo i gospodina Zurahida Mujčinovića.
- 5.Istina o općini Srebrenik, o njenim najhrabrijim sinovima i njihovim djelima u najtežim trenucima za opstanak Bosne i Hercegovine je krvlju ispisana i neće je, niti ćemo dozvoliti, da je bilo tko mijenja ili kalja.
- 6.Naš cilj nije da branimo zločince i zločine, ma sa koje strane bili učinjeni i od bilo koga, jer zločin je zločin a zločinac je zločinac. Naša želja je da se javnost upozna sa istinom i činjenicama o odbrambenom ratu na ovim prostorima i oštro osude insinucije i neistine od bilo koga ko nije relevantan da daje ocjene i osude.

Premijer Vlade TK-a Sead Čaušević sa ministrima posjetio općinu Srebrenik

Načelnik općine Srebrenik Sanel Buljubašić sa svojim saradnicima, dana 23.11.2012.g., ugostio je premijera Vlade TK Seada Čauševića sa ministrima, kako bi se u narednom periodu pokušali riješiti krucijalni problemi koji stoje pred izvršnom i zakonodavnom vlašću Općine. –„Ovo je radna posjeta općini Srebrenik gdje smo, prije svega, željeli upoznati novog načelnika Buljubašića te sa njim dogovoriti način i dinamiku realizacije brojnih projekata, koji su ili započeti u ranijem periodu te sada treba pomoć Vlade TK ili javnih preduzeća, poput Elektroprenosa BiH-direkcija Tuzla i BH Telecoma-direkcija Tuzla, čiji su predstavnici takođe sa nama, radi nastavka i završetka realizacije istih ili su u pitanju novi projekti koje je pripremila općine Srebrenik i za koje treba naša pomoć. Konkretizirali smo prioritete koje je potrebno uraditi u općini Srebrenik, a to je prije svega:



Premijeru Vlade TK je priredjen srdačan doček



Detalj sa sastanka u kabinetu načelnika Buljubašića

vodosnabdijevanje, nastavak radova na toplifikaciji grada Srebrenika, rješavanje pitanja deponije otpada u Babunovićima i saobraćajna infrastruktura. I pored kratkog vremena mislim da je ovaj sastanak bio obostrano koristan, jer su razmijenjene informacije o brojnim projektima. Vlada TK-a odn. njeni ministri, sa mnom na čelu, je uvijek spremna pomoći, naravno u skladu sa mogućnostima kantonalnog budžeta"-istakao je nakon sastanka premijer Čaušević. Načelnik Sanel Buljubašić bio je zadovoljan posjetom premijera te je iznio neke detalje sa ovoga sastanka: „Zadovoljan sam sastankom jer premijer i njegovi ministri, kao i direktori značajnih JP-a

žele iskreno da sarađuju sa općinom Srebrenik. Kazali smo svoje prioritete koje trebamo riješiti i on je obećao da će nam pokušati izaći u susret. Premijer je naveo prioritete te se nadam svakoj vrsti pomoći kako bismo neke, i pored lošijeg punjenja lokalnog budžeta, realizovali već do kraja godine, dok realizacija preostalih slijedi u narednom periodu-istakao je načelnik Buljubašić. Načelnik Buljubašić i premijer Čaušević su odvojili dio vremena kako bi prisustvovali dženazi trojice mladića iz Srebrenika, koji su nedavno izgubili život u saobraćajnoj nezgodi, nakon čega su prisustvovali Svečanoj sjednici održanoj povodom 25. novembra, Dana državnosti Bosne i Hercegovine.

Potpredsjednik FBiH Svetozar Pudarić posjetio općinu Srebrenik

Dana 19.11.2012.godine, potpredsjednik Federacije BiH Svetozar Pudarić, posjetio je općinu Srebrenik. Uglednog gosta su srdačno dočekali općinski načelnik mr.sc. Buljubašić Sanel i njegovi najbliži saradnici, dok je na sastanku bio prisutan i Mehmedović Enver, srebrenički poslanik u Predstavničkom domu Parlamenta FBiH. Načelnik je potpredsjednika Pudarića upoznao sa trenutnim stanjem u općini Srebrenik i o nekim budućim projektima, dok je potpredsjednik čestitao Buljubašiću na izboru za novog načelnika općine Srebrenik, te mu žaželio uspjeh u budućem radu, napomenuvši kako će mnogi konstruktivni prijedlozi, čija realizacija poboljšava kvalitetu života stanovnika, naići na potporu kako Vlade FBiH tako i njegovu ličnu. Na sastanku je, između ostalog, razgovarano i o problemu javnih prihoda i kapitalnih ulaganja, razvoju



Načelnik Buljubašić je uručio Pudariću bakrorez Starog grada i Povelju



Detalj sa sastanka

privrede na ovom općinskom području, stvaranju povoljnijeg ambijenta za strana ulaganja te o revitalizaciji Starog grada Srebrenika i mogućnostima razvoja kulturnog turizma. Načelnik Buljubašić je ovom prilikom uručio Pudariću prigodne poklone (bakrorez Starog grada i Povelju). Nakon sastanka Pudarić je posjetio Osnovnu školu „Sladna" gdje je razgovarao sa menadžmentom škole o aktivnostima koje se provode na što kvalitetnijem obrazovanju učenika. Ovom prilikom Pudarić je školi uručio i donaciju od pet računara, kao izraz podrške školi na planu uvođenja novih metoda nastave, kao i uvođenju novih tehnologija u obrazovni proces.

Odobreno 65.000 KM za stipendije i kredite za školsku/akademska 2012/2013. godinu

Dana 27.12.2012.godine, u Plavoj sali Doma kulture u Srebreniku, učenici i studenti sa područja općine Srebrenik su potpisali ugovore sa Općinom o stipendiranju i kreditiranju za školsku 2012/2013. g., vrijedne ukupno 65.000 KM. Riječ je o 26 učeničkih stipendija te 62 studentska kredita, iako je za ove namjene aplicirao daleko veći broj učenika i studenata. Svaki učenik dobit će po 500 KM i to u deset jednakih mjesečnih rata po 50 KM, a svaki student po 800 KM i to po 80 KM svakih deset mjeseci, i nadam se da će im to pomoći u lakšem i kvalitetnijem školovanju. Znam da su mnogi ostali uskraćeni za kredit odn. stipendiju, jer sredstva nisu ni blizu dovoljna za sve



Dodjela Ugovora o studentskom kreditu. Buljubašić Halimi



Detalj sa potpisivanja ugovora

aplikante, ali, ukoliko to bude dopuštalo stanje u budžetu, razmislićemo o eventualnom povećanju broja korisnika stipendija i kredita, kazao je načelnik općine Srebrenik Sanel Buljubašić, koji je iskoristio priliku da učenicima i studentima čestita Novu 2013. godinu te im zaželio puno zdravlja i uspjeha u nastavku školovanja. Zadovoljstvo potpisivanjem Ugovora o stipendiranju sa Općinom, nisu skrivali ni studenti, a Buljubašić Halima, studentica 2. godine Filozofskog fakulteta u Tuzli kazala nam je: -Sretna sam i zadovoljna što sam ispunila kriterije za dobivanje studentskog kredita. Zahvaljujem se općinskom načelniku i nadležnoj Službi što nam svake godine omogućavaju povoljne kredite i stipendije, i mislim da će mi, kao uostalom i ostalim dobitnicima, ova sredstva biti od velike koristi tokom nastavka školovanja.

Potpisani ugovori sa korisnicima bespovratnih sredstava iz oblasti boračko-invalidske zaštite

Sredinom decembra 2012.godine, u Plavoj sali Doma kulture u Srebreniku, uz prisustvo savjetnika načelnika za infrastrukturu Hodžić Damira i šefa Službe za boračko-invalidsku zaštitu Slanjankić Razima, održana je skromna svečanost u povodu potpisivanja ugovora o raspodjeli bespovratnih sredstava za stambeno zbrinjavanje boračke populacije na području ove općine. Ugovore su potpisali predstavnici 22 boračke porodice, od čega 12 iz kategorije porodica šehida i 10 porodica demobilisanih boraca, dok su ugovori s devet porodica ratnih vojnih invalida potpisani u septembru ove godine. Na osnovu potpisanih ugovora, na 22 porodice šehida i demobilisanih boraca raspodijelit će se ukupno 247.000 maraka, dok je ranije raspoređeno 68.500 KM ratnim vojnim invalidima. U skladu sa socijalnim statusom i stepenom dovršenosti njihovih stambenih objekata, boračke porodice će dobiti bespovratna sredstva u iznosima od 6.000 do 18.000 KM, a sredstva je osigurala Vlada Tuzlanskog kantona. Kako ističe Razim Slanjankić, šef Općinske službe za boračko-invalidsku zaštitu Srebrenik, riječ je o bespovratnim sredstvima za 2011. godinu koja, zbog nedostatka novca u budžetu Tuzlanskog kantona, nisu mogla biti isplaćena do sada. Inače osim navedene aktivnosti predstavnici Službe za BiZ i organizacije PŠ-PB su, povodom najdražeg katoličkog blagdana Božića, posjetili porodice poginulih pripadnika HVO-a sa našeg općinskog područja a 18.12.2012.g. je

završena konkursna procedura prijave učenika i studenata, iz reda boračkih populacija, za dodjelu stipendija i kredita od strane Ministarstva za boračka pitanja Tuzla. Putem ove Službe je podneseno ukupno 248 zahtjeva od čega na učeničke stipendije otpada 126 zahtjeva a na studentske kredite 122 zahtjeva.



Detalj sa potpisivanja ugovora

Za izgradnju nove općinske zgrade u Srebreniku četiri miliona KM

Dana 05.11.2012.g., dosadašnji načelnik općine Srebrenik Mehmed Bajrektarević i direktor firme „Herceg“ d.o.o. Srebrenik Ramiz Karić, koji je nastupio u ime konzorcija srebreničkih firmi, koji, pored nosioca posla firme Herceg, čine firme: Gromeks, ITK Musić, Hidromont, Elvik i Hinel, su potpisali ugovor o izvođenju radova na izgradnji nove zgrade za općinske organe uprave u Srebreniku. Navedenom potpisivanju prisustvovao je dosadašnji predsjedavajući OV-a Srebrenik prim. dr. Ibrahim Zukić, šefovi općinskih službi i savjetnici načelnika Bajrektarevića te brojni predstavnici medija. – „Nakon što je Vlada FBiH prihvatila zaduženje FBiH od 2,6 miliona dolara po Sporazumu o kreditu Saudijskog fonda, projekt izgradnje zgrade za općinske organe uprave u Srebreniku došao je u završnu fazu tj. danas smo potpisali Ugovor sa firmom „Herceg“ d.o.o. Srebrenik, predstavnikom konzorcija srebreničkih firmi, koji je ponudio najbolje uslove na međunarodnom tenderu. Kredit je sa rokom otplate od 25 godina, uz grejs period od pet godina i kamatnu stopu od jedan posto na godišnjem nivou. Kredit će se vraćati u dvije rate godišnje i to 15. februara i 15. avgusta svake godine otplatnog roka, s tim da se iz ovih sredstava ne mogu plaćati carine, porezi i druge dadžbine. Izgradnjom nove zgrade konačno će se riješiti višegodišnji nedostatak adekvatnog prostora za općinske službe koje su sada smještene u neuslovnim prostorima na više različitih lokacija u gradu Srebreniku. Realizacija ovog projekta omogućit će da se organi uprave u Srebreniku smjeste na jednom mjestu radi njihovog efikasnijeg rada. Predviđeni rok završetka gradnje je do 2 godine dana.“-istakao je Bajrektarević. – „Zgrada organa uprave općine Srebrenik je projektovana kao slobodno-stojeća zgrada okvirnih dimenzija 50 x 12 m, spratnosti podrum + prizemlje + 3 etaže sa krovnom



Prednja fasada nove općinske zgrade

etažom koja uključuje prohodni ravni krov. U podrumskom dijelu objekta obezbijeđeno je deset garažnih mjesta, prostor za arhivu, prostor za klima komoru, agregat i kotlovnicu. Na istoj etaži je projektovano dvonamjensko sklonište, odnosno zaklon, u kojem se predviđaju prostori ostave. Ulazi u objekt su razdvojeni za zaposlene i za građanstvo, čije će se komuniciranje sa zaposlenima odvijati preko moderne šalter sale u prizemlju objekta. U prizemlju objekta će se nalaziti višenamjenska sala koja će se koristiti za sastanke Općinskog vijeća odn. za vjenčanja, savremeni informacijski centar, iznad su tri sprata sa kancelarijama za sve općinske službe te prostorno znatno manji četvrti sprat i restoran na krovnoj terasi. Ukupna korisna površina je oko 2400 m². Vertikalna komunikacija će biti omogućena dvokrakim stepeništem i liftom, koji zadovoljava potrebe invalidnih lica. Konzorcij srebreničkih firmi, koji je na međunarodnom tenderu ponudio najbolje uslove, je sposoban uspješno izvesti sve građevinske i građevinsko-zanatske radove te privesti kraju i ovaj projekat. U dijelu uređenja i opremanja građevinskog zemljišta na kojem se izvodi objekt predmetne zgrade, neophodno je izvesti i pristupne puteve, kako bi se omogućio kvalitetan prilaz iz područja gradskog centra, kao i veza sa magistralnom i regionalnim cestama. U tu svrhu je predviđena i rekonstrukcija pristupnih puteva prema obezbijeđenoj projektno-tehničkoj dokumentaciji. U svrhu obezbjeđenja priključka predmetne zgrade na centralnu gradsku kotlovnicu, urađen je projekt toplovoda koji je uglavnom trasiran naprijed navedenim pristupnim ulicama“-istakao je Karić Ramiz.

Otvorena područna apoteka u Podorašju

Početkom oktobra 2012.g., u adaptiranim prostorijama starog Doma, uz prisustvo predstavnika izvršne i zakonodavne vlasti općine Srebrenik te brojnih građana otvorena je područna apoteka u Podorašju. – „JZU „Gradska apoteka“ Srebrenik osim centralne apoteke u Srebreniku do sada je otvorila područne apoteke u Tinji i Sladnoj, a ovom prilikom otvaramo i apoteku u Podorašju. Ovo je nastavak realizacije naše misije i vizije razvoja a to je da apotekarske usluge približimo građanima širom naše Općine, a ovim projektom smo „pokrili“ prostor sa oko 2000 korisnika iz Lisovića, Brezika, Zahirovića, Podorašja i Jasenice. Radove na rekonstrukciji oronulog Doma u Podorašju smo, uz pomoć općine Srebrenik, zajedno sa predsjednikom MZ Podorašje Fazlić Ahmetom, koji je i iznio najveći teret, započeli 2011. g., a konačno su svi radovi ove faze završeni“-istakao je Junuzović Nuraga, predsjednik Upravnog odbora JZU „Gradska apoteka“ Srebrenik. – „Kompletno je renoviran krov kojem je prijetilo urušavanje, ubačeni su novi prozori i vrata, urađena je nova elektro i vodovodna instalacija, urađena je unutrašnja i vanjska fasada te pristupno stepenište a u dijelu doma je urađena kotlovnica. Vrijednost svih radova do sada je oko 70.000 KM. Osim apoteke renoviran je i prostor u kojem će se

smjestiti ambulanta porodične medicine te prostor koji će moći koristiti MZ-a odn. neka udruženja građana i NVO, dok u narednom periodu planiramo adaptaciju prostora i na spratu ovog Doma“-istakao je Fazlić Ahmet.



U adaptaciju starog Doma u Podorašju utrošeno je oko 70.000 KM

U novo kotlovsko postrojenje investirano 750.000 KM

Dana 15.10.2012.g. zvanično je u pogon pušteno novo kotlovsko postrojenje kod MSŠ Srebrenik, u koje je investirano oko 750.000 KM. Ceremoniji svečanog otvorenja su prisustvovali zamjenici predsjednika Skupštine TK-a iz reda bošnjačkog i hrvatskog naroda Jašarević Bajazit i Šimić Zlatko, načelnik općine Srebrenik Mehmed Bajrektarević, predsjedavajući OV-a Srebrenik Ibrahim Zukić, općinski vijećnici, šefovi općinskih službi, savjetnici općinskog načelnika, privrednici te predstavnici medija. Simboličkim pritiskom na taster automatike kotla



Koordinator projekta Karić Fahrudin pojašnjava rad kotlova na bio masu

kotlovnici su zajednički pustili u pogon Jašarević Bajazit i Bajrektarević Mehmed. – „Vijećnici OV-a Srebrenik su svojim zaključkom iz 2009. g. usvojili koncept faznog rješavanja toplifikacije, koji bi se proveo kroz rekonstrukciju postojećih i izgradnju novih mini toplana na bio masu (snage od 1 do 4 MW). Tokom prethodnih godina urađena je Studija o odabiru energenta za sistem toplifikacije te Studija o ekonomskoj opravdanosti izgradnje sistema daljinskog grijanja. Kao najpovoljniji energent izabrana je bio masa (šumska bio masa, ostaci od rezidbe voćaka i sl.) koja ima visok stepen iskoristivosti odn. veoma male toplotne gubitke. Nakon toga urađen je Idejni projekat te u 2011. g. i Glavni projekat toplifikacije Centra Srebrenika - I faza. Samo 3 velike zajedničke kotlovnice u Srebreniku su spaljivale godišnje oko 700 tona uglja lošeg kvaliteta, a brojne individualne kotlovnice i peći, koje su uglavnom bazirane na ugalj kao gorivo, su u grejnom periodu činile značajan izvor zagađenja zraka u gradu, čemu smo morali „stati u kraj“. Ovim činom je završena kompletna rekonstrukcija postojeće kotlovnice kod MSŠ Srebrenik u koju su ugrađena 2 moderna kotla na bio masu snage po 2 MW (ukupno 4MW) sa kompletnom automatikom, sa koje su trenutno napojeni objekti MSŠ Srebrenik, Prve OŠ Srebrenik te JZU Dom zdravlja Srebrenik, dok će se u budućnosti nakon izgradnje toplovoda napojiti toplotnom energijom: nova zgrada općinske uprave, Sportska dvorana, zgrada MUP-a i Porezne uprave, Pošta, poslovni objekat ZTC u ulici Alije Izetbegovića, stambene zgrade Tinjanka I, Srebrenka I, Zlatiborka te SPO-i u ulici Alije Izetbegovića i ulici 1. Marta... U finansiranju I faze toplifikacije, čija se vrijednost procjenjuje na oko 1.500.000 KM, učestvovalo je Ministarstvo prostornog uređenja i zaštite okolice TK sa 500.000 KM, dok se preostali iznos finansira iz općinskog budžeta. Od nezavršenih radova I faze preostalo je da se putem javne nabavke ugovori izgradnja distributivnog toplovoda za okolne stambeno-poslovne objekte koja košta oko 450.000 KM te ugovori javna nabavka mašina potrebnih za pripremu i transport drveta (sječke) te prostora za skladištenje drveta (nadstrešnice) koja košta oko 300.000 KM”- istakao je Bajrektarević. Proces rada u kotlovnici je pojasnio Karić Fahrudin, koordinator projekta, koji je između ostalog istakao: -U narednom periodu, po završetku I faze, slijedi reali-



Stroj za pripremu sječke u krugu JKP „9. septembar“ Srebrenik

zacija II, III i IV faze toplifikacije grada Srebrenika. Cijena koštanja II faze toplifikacije se kreće oko 900.000 KM. U sklopu II faze izvršiće se rekonstrukcija kotlovnice u sklopu JU Centar za kulturu i informisanje Srebrenik te ugraditi kotao na bio masu, snage 2MW. Kotao će moći toplotnom energijom snabdjeti oko 20.000 kvadratnih



Detalj iz unutrašnjosti novog kotlovskog postrojenja

metara stambenog i poslovnog prostora te pored Doma kulture i SPO Bistrica I i II, SPO Hanka, Robna kuća Srebrenka, SPO iznad Obdaništa, JU Obdanište i dr. Realizacijom I i II faze projekta Toplifikacije značajno će se povećati energetska efikasnost, smanjiti aero zagađenje i protivpožarna ugroženost gotovo kompletnog Centra Srebrenika. Toplifikacija grada Srebrenik - I faza, je projekat koji će nakon izgradnje biti 100 % u vlasništvu općine i koji je ekonomski samoodrživ. Nove mini toplane trebale bi zamijeniti veliki broj postojećih individualnih kotlovnica u centru grada, a novi kotlovi, umjesto uglja, koristiti će biomasu tj. obnovljivi izvor energije, što je trenutno na tržištu najjeftinije i najefikasnije grijanje. Cijena koštanja III i IV faze toplifikacije je oko 2.600.000 KM. U sklopu ovih faza planirana je izgradnja novih kotlovnica, ukupne snage 5 MW, koje bi toplotnom energijom snabdijevale preostali dio grada Srebrenika, odnosno oko 50.000 kvadratnih metara stambenog i poslovnog prostora. Između ostalog predviđeno je zagrijavanje SPO-a Spahijina njiva, SPO Nita, SPO ITK Musić,..., a u kasnijoj fazi i eventualno zagrijavanje nekih obližnjih prigradskih naselja, kao što su Bare, Čehaje, Babunovići...-istakao je Karić.

U Centar za djecu s posebnim potrebama u Srebreniku uloženo 150.000 KM

Dana 23.11.2012.g, zvanično je otvoren Centar za djecu s posebnim potrebama u Srebreniku, u koji je investirano oko 150.000 KM. Ceremoniji svečanog otvorenja su prisustvovali zamjenik rezidentnog UNDP koordinатора Zahira Virani sa saradnicima, ministar za rad i socijalnu politiku u Vladi TK-a Sead Hasić, predstavnici izvršne vlasti općine Srebrenik, predstavnici i korisnici usluga Udruženja građana penzionera – civilnih invalida I i II kategorije Općine Srebrenik, uposlenici koji će raditi u navedenom centru te brojni mediji. Simboličkim presijecanjem vrpce Centar za djecu s posebnim potrebama u Srebreniku su zajednički otvorili Zahira Virani, Sead Hasić i Enes Džanić. –

„Načelnik općine Srebrenik Mehmed Bajrektarević i



Zahira Virani (UNDP): nastavicemo pomagati projekte koji imaju za cilj osjetljive kategorije društva

UNDP-ov rezidentni koordinatore Jurij Afanasiev, potpisali su dana 02.10.2011. godine ugovor o izgradnji Centra za djecu s posebnim potrebama u Srebreniku. Riječ je o Centru kapaciteta 60 djece s posebnim potrebama a koja će koristiti dnevni boravak sa svojim učiteljima. Iako zbog opravdanih razloga danas nije s vama, prenosim zadovoljstvo načelnika Bajrektarevića što će ova djeca konačno dobiti adekvatne prostorije za boravak-istakao je u ime načelnika Esad Dedić, viši stručni saradnik za informisanje i protokol općine Srebrenik. – „Želja nam je da se ova djeca što bolje integrišu u društvu i zato smo učinili sve da pomognemo izgradnju ovog Centra, koji je uz općinu Srebrenik i UNDP, u podjednakom iznosu finansirala i Vlada TK, kazao je ministar Hasić. – „Udruženje građana



Sead Hasić: izgradnju Centra smo pomogli sa 50.000 KM

penzionera – civilnih invalida I i II kategorije Općine Srebrenik je osnovano 18.08.2006 godine a iz razloga nepostojanja ili neadekvatnog rada sličnih ili srodnih udruženja u rješavanju osnovnih problema i ostvarivanja prava osoba sa invaliditetom svih kategorija. Ciljna grupa koja je obuhvaćena ovim projektom i koja ima direktnu



Trenutak svečanog otvorenja Centra



Detalj sa svečanog otvorenja Centra

korist od završetka implementacije ovog projekta jesu djeca sa posebnim potrebama i djeca s invalidnošću sa područja općine Srebrenik. Broj djece na području općine Srebrenik a prema bazi podataka koju smo prethodno uspostavili jeste 110-ero djece, od toga 70 muškog i 40 ženskog spola. Starosna dob djece se kreće u rasponu od 1-18 godina. Posebna napomena da su u ovoj ciljnoj grupi zastupljene sve 3 konfesije. Projekat „Formiranje dnevnog boravka za djecu s posebnim potrebama“ je tako koncipiran da primarnu korist od projekta imaju sama djeca sa posebnim potrebama kao ciljna grupa, a korist se ogleda u tome što je kompletan program rada planiran i prilagođen sposobnostima i mogućnostima svakog djeteta, a sekundarnu korist imaju roditelji, škole i društvena zajednica u cjelini. Taj plan i program je proizašao i urađen na osnovu njihovih potreba a koje nisu mogli da zadovolje u porodici, u trenutnom sistemu školovanja ili nekim drugim institucijama koje su trebale da se bave ovom problematikom. Potrebe ove djece su definisane prema sljedećim segmentima: prva i osnovna potreba jeste samopomoć i samoposluživanje kojim će se postići da djeca u svom okruženju mogu maksimalno da iskoriste svoje sposobnosti za samostalan život u skladu sa svojim mogućnostima. Prema svakom djetetu napravljen je individualan program rada a na osnovu njihovih mogućnosti, afiniteta i ostvarivih želja koji takođe podrazumijeva i potrebu za različitim vidovima edukacije kao što su odgojno-obrazovne radionice, informatičke, kreativne, relaksirajuće, okupaciona radna terapija i sl.“- istakao je Džanić. – „Pomogli smo izgradnju Centra za dnevni boravak djece s posebnim potrebama u Srebreniku, korisne površine 177 m², a nastavicemo i ubuduće da pomažemo slične projekte, koji za cilj imaju osjetljive kategorije društva. Mene kao majku posebno raduje što će brza i kvalitetna realizacija projekta pomoći ovim dragim, mladim bićima, kojima će se, potpuno sam sigurna, život poboljšati na bolje“- istakla je gospođa Virani tokom ove svečanosti.

Prezentiran elektronski registar administrativnih procedura u Općini Srebrenik

U Srebreniku je pri kraju projekat „Regulatorna reforma u Općini Srebrenik“, koji je u partnerstvu sa Općinom sprovela Međunarodna finansijska korporacija (IFC) iz Grupacije Svjetske banke. Ukupna vrijednost projekta je 138.244 KM u čemu IFC učestvuje sa 93.244 KM, dok je učešće općine Srebrenik 35.000 KM u sredstvima i opremi te 10.000 KM u gotovini. Ukupne uštede sprovođenjem skraćenih procedura unutar organa uprave Općine Srebrenik iznose preko 5 miliona KM na godišnjem nivou od čega su uštede za građane oko 28.148 KM dok su za poslovni sektor uštede oko 5 miliona KM. Od tog iznosa oko 74.000 KM su direktni troškovi te 4,9 miliona KM indirektni troškovi zbog skraćivanja rokova i povećanja efikasnosti. konačni cilj ovog projekta je efikasna organizacija i pojednostavljenje administrativnih postupaka koji se odnose na razna rješenja, uvjerenja, dozvole i saglasnosti koje se izdaju na nivou općine Srebrenik odn. unapređenje klime za poslovanje u Srebreniku putem smanjenja troškova i rizika poslovanja. U ime Međunarodne finansijske korporacije (IFC) prisutnima se obratio Tarik Šahović, menadžer ovog projekta i rekao da je izuzetno zadovoljan urađenim jer je općina Srebrenik gotovo sve što je bilo planirano da se uradi za godinu dana realizovala za samo 8 mjeseci što je veliki uspjeh. I on je podcrtao značaj skraćivanja administrativnih procedura u ovoj općini koje su već rezultirale značajnim smanjenjem admini-



Prezentaciju elektronskog registra je uradio Nedim Mujčinović

strativnih taksi i naknada, a uskoro slijedi novo smanjenje taksi i naknada. Ovaj projekat i rezultate koji se s njim postižu prezentirao je koordinator projekta Nedim Mujčinović, koji je istakao da se Elektronski registar svih procedura može naći na web stranici općine Srebrenik: www.srebrenik.ba.

Radni sastanak sa predstavnicima Kraljevine Saudijske Arabije i Ministarstva finansija i trezora BiH



Hodžić Damir, ambasador Eid Mohammed Althakafi i Buljubašić Sanel

Dana 12.12.2012.g. općinski načelnik Sanel Buljubašić, sa saradnicima, u Sarajevu je održao radni sastanak, na kome su prisustvovali uvaženi gosti: ambasador Kraljevine Saudijske Arabije u BiH, ekselencija Eid Mohammed Althakafi, delegacija Saudijskog Fonda za razvoj iz Rijada - Saudijska Arabija u sastavu: Mr. Mohammed S. Aldalilan, Mr. Mohammed M. Alsufyani, Mr. Jasser A. Aljasser i Eng. Sulaiman A. Alwetaid te direktor Organizacije Islamske Kooperacije - Fond za povratak izbjeglica BiH, qosp. En-

Nur Swar Eddahab. Među gostima je bila i delegacija Ministarstva finansija i trezora BiH u sastavu: Miroljub Krnić - pomoćnik ministra Nikole Špirića, Bejta Ramović - šef odjela za finansijske aranžmane, Lemana Vranić- stručni savjetnik i Svjetlana Vukojičić - stručni saradnik za implementaciju. Načelnik Buljubašić se zahvalio na dolasku i prisustvu cijenjenih i uvaženih gostiju te kao domaćin ukratko predstavio općinu Srebrenik i naše planove i projekte koji su predviđeni za realizaciju u narednom periodu. Potencirao je problem vodosnabdijevanja te problem odvodnje i prečišćavanja otpadnih voda, uz izgradnju kanalizacionih sistema, na području naše Općine, posebno istakavši MP-a Tinje, Podorašja i Dubokog Potoka, kao najugroženije. Gorući problem Općine Srebrenik je i sanitarna deponija smeća u MZ Babunovići, koja je već ranije sanirana i u fazi zatvaranja, koje je predviđeno do kraja 2013.g. Potrebno je uskoro pronaći odgovarajuću lokaciju za novu deponiju ili, udruživanjem sa drugim općinama, koje imaju sličan problem, riješiti ga izgradnjom zajedničke deponije. U nastavku izlaganja načelnik Buljubašić je prezentirao i projekat izgradnje nove školske zgrade Gimnazije, kao jedan od bitnijih projekata za Općinu Srebrenik. Članovi Delegacije Saudijskog fonda za razvoj, predstavnik Ministarstva finansija BiH, Miroljub Krnić, kao i direktor Organizacije islamske kooperacije, En - Nur Swar Eddahab, su se zahvalili načelniku na pozivu i toplom prijemu, iskazavši svoju spremnost za učešće u realizaciji navedenih, kao i drugih značajnih, projekata u našoj Općini, uz napomenu da za sve to treba dostaviti ili uraditi, što je rađeno i do sada, kvalitetnu projektno - tehničku dokumentaciju i zahtjeve. Ovi projekti bi mogli biti realizovani iz grant sredstava, kao i vrlo povoljnih zajmova za općinu Srebrenik. Načelnik Buljubašić se zahvalio svim prisutnima gostima, a posebno ambasadoru Kraljevine Saudijske Arabije, ekselenciji Eid Mohammed Althakafi-ju, na svemu onome što su on i njegova domovina do sada učinili na pomoći BiH i Srebreniku (povoljan zajam za izgradnju nove zgrade općinskih organa uprave). Zahvalnost je uputio i pomoćniku ministra finansija i trezora BiH Nikole Špirića, Krnić Miroljubu, na pomoći oko realizacije navedenog projekta „Izgradnja nove zgrade općine Srebrenik“.

Novi načelnik općine Srebrenik Buljubašić Sanel održao sastanke sa brojnim udruženjima



Srdacan pozdrav novog i bivšeg načelnika općine Srebrenik

Dana 12.11.2012.godine, u prostorije općine Srebrenik i u kabinet načelnika, stigao je novoizabrani načelnik općine Srebrenik, gospodin Sanel Buljubašić. Ispred općinske zgrade ga je dočekala grupa prijatelja, koja mu je poželjela srdačnu dobrodošlicu i uručila i prigodan poklon, poželjevši mu pri tome sreću na novoj funkciji i novom radnom mjestu. U kabinetu načelnika ga je dočekao i raniji načelnik, gospodin Mehmed Bajrektarević, koji mu je takođe poželio sretan dolazak i rad na novom radnom mjestu. Načelnik Buljubašić je sutradan otputovao u Sarajevo, na poziv CIK BiH, gdje mu je uručen certifikat, čime je i zvanično potvrđen za načelnika općine Srebrenik. U toku sedmice je završen i proces oko službene primopredaje dužnosti, u kome je novoizabrani načelnik dobio sve podatke vezane za rad općine Srebrenik u proteklom periodu. Načelnik Buljubašić se svima zahvalio na toplom dočeku i prijemu a narednih dana i sedmica je održao nekoliko sastanaka sa raznim udruženjima građana. Tako je općinski načelnik Sanel Buljubašić, sa svojim najbližim saradnicima, održao sastanak sa predstavnicima svih vjerskih zajednica sa područja Općine Srebrenik. Sastanku su prisustvovali ispred Medžlisa islamske zajednice Srebrenik, predsjednik Mevludin ef. Joldić i gl. imam Refik ef. Hodžić, ispred Župe Svetog Josipa -



Detalj sa susreta sa predstavnicima vjerskih zajednica

Špionica, Fra Miroslav Ikić te ispred Srpske pravoslavne crkve u BiH, Parohija Špioničko - Jasenička, Jerej Dragan Pavlović. Ovo je bio prvi sastanak novog načelnika sa predstavnicima vjerskih zajednica sa našeg područja a osim međusobnog upoznavanja, bila je to i prilika da se porazgovara o problemima vjerskih zajednica, sa kojima se susreću u svome redovnom radu i djelovanju, sa posebnim akcentom na planirane projekte i podršku općine Srebrenik u narednom periodu. Djeca iz Dječijeg vrtića u Srebreniku, zajedno sa svojim vaspitačicama i direktorom, takođe su posjetila općinskog načelnika Sanela Buljubašića. Načelnik se obradovao ovoj posjeti i poklonima - crtežima koji su mu djeca uručila, a sve to je praćeno i sa nekoliko recitacija i pjesmica, koje su polaznici Dječijeg vrtića zajedno izveli. U ugodnom razgovoru i uz sok, druženje je završeno uz obećanje da će načelnik uskoro uzvratiti posjetu. Načelnik je održao sastanak i sa predstavnicima Udruženja Civilnih



Načelnik sa djecom i uposlenicima Dječijeg vrtića

invalida I i II kategorije iz Srebrenika. U dužem i prijatnom razgovoru, predsjednik ovog udruženja, Enes Džanić je načelnika i njegove saradnike upoznao sa aktivnostima koje je ovo udruženje vodilo u proteklom periodu od svog osnivanja, kao i planovima za 2013. godinu. Konstatovano je da je do



Susret sa predstavnicima boračkih organizacija

dan danas ovo udruženje uradilo jako mnogo, prije svega za djecu sa posebnim potrebama kao i za civilne invalide naše Općine. Zahvaljujući njihovom radu i upornosti, kao i poznanstvu i prijateljstvu sa ljudima iz njemačke organizacije "MALTEŠKI VITEZOVI" koje je animirala naša sugrađanka Amira Hodžić -



Susret sa predstavnicima civilnih invalida

Bieber, koja živi i radi u Njemačkoj, preko ovog udruženja je u Srebrenik do sada. a u vidu donacija. stiglo 1 vatrogasno vozilo, komplet radio uređaja i moderna radio mikseta za Radio Srebrenik, školski namještaj za brojne škole, muzički instrumenti za školske orkestre, moderni i novi kreveti za nepokretne osobe, invalidska kolica, štake... Vrijednost ovih donacija je oko 1 milion KM a u planu su i nove još veće, vrednije i značajnije donacije. Načelnik je održao sastanak i sa članovima Upravnog odbora (UO) Udruženja privrednika Općine Srebrenik. Sastanku su prisustvovali Mirza Ordagić - predsjednik UO te članovi UO: Devleta Imširović, Suljo Herceg, Ramiz Karić, Ismet Šiljić, Mato Jurić, Taib Joldić, Kemal Alatić, Hazim Bašić i Hazim Muratović. Uz čestitke na izboru za načelnika Općine Srebrenik, privrednici su iznijeli svoje viđenje o poboljšanju sveukupne poslovne klime na području naše Općine. Osim navedenih susreta načelnik je primio predstavnike Sportskog saveza i brojnih sportskih kolektiva te nekih udruženja građana, dok je obišao i profesionalnu vatrogasnu jedinicu.



Ibrahim Zukić (SDA)



Damir Babajić (SDA)



Adis Fazlić (SDA)



Fahir Zukić (SDA)



Jasmin Brašnjić (SDA)



Nermin Tursić (SDA)



Nihad Kulović (SDA)



Safet Omerović (SDA)



Raif Dedić (SDA)



Nermin Okić (SDA)

Zihir Suljić (SDP)
zam. predsjedavajuće OV-a

Mustafa Muratović (SDP)



Suad Jašarević (SDP)



Azra Imširović (SDP)



Sejfudin Suljić (SDP)



Helena Omerović (SDP)



Izudin Zahirović (SDP)



Hasib Buljubašić (SBB)



Omer Ibršimović (SBB)



Ibrahim Salihović (BPS)



Mehmedalija Sarajlić (BPS)



Edin Mutapčić (S BiH)



Jusuf Hasić (S BiH)



Amir Husarić (LDS)



Rifat Morankić (LDS)



Mirza Ordagić (SRzB)



Muhamed Ordagić (SRzB)

Vesna Veselčić (HDZ)
predsjedavajuća OV-aAlen Bafčari –predstavnik
nacionalnih manjina

*Vijećnici Općinskog
vijeća općine Srebrenik
2012 g. – 2016 g.*

Uskoro se očekuje potpisivanje Povelje o bratimljenju Srebrenika i Edremita



Sanel Buljubašić, Ahmet Kemal Baysak i Adnan Bjelić

Krajem februara 2013. godine delegacija općine Srebrenik, na čelu sa načelnikom općine Buljubašić Sanelom, održala je niz sastanaka u Sarajevu. Prvi sastanak je održan sa Počasnim konzulom BiH u R. Turskoj, g-dinom Ahmet Kemal Baysak-om, sa kojim je načelnik naše općine razgovarao o završnim radnjama oko potpisivanja Povelje o bratimljenju sa općinom Edremit iz grada i regije Izmir u Turskoj. Općina Edremit ima oko 60 hiljada stanovnika a sam grad i regija Izmir oko 4 miliona. Od jedanaest općina u Izmiru u njih 7 - 8 su načelnici općina Bošnjaci, jer je u ovome kraju velika populacija Bošnjaka koja se u proteklih stotinjak godina bježeći od ratnih stradanja, pokolja, ratova i raznih "mirnodopskih" pritisaka, raselila sa svojih ognjišta iz Bosne i Hercegovine i drugih krajeva Jugoslavije. Kako je istaknuto na sastanku aktivnosti su privedene kraju, na obje strane su Odluke donešene i usvojene, tako da se uskoro očekuje i svečano potpisivanje Povelje o bratimljenju, prvo u Turskoj a potom i u Srebreniku. Razgovaralo se i o drugim vidovima saradnje na poljima kulture, sporta, umjetnosti kao i ekonomije, a razmijenjeni su i prigodni darovi, sa obje strane. Načelnik Buljubašić se zahvalio g-dinu Baysak-u na svemu onome što čini u uspostavljanju mostova saradnje i prijateljstva između BiH i Turske. Naša delegacija je potom posjetila i BIGMEV - Centar



Naša delegacija je posjetila i BIGMEV

za razvoj odnosa sa BiH, čija misija je razvoj privrednih odnosa i povezivanje privrednika iz BiH i R. Turske, gdje se razgovaralo o određenim projektima i planovima naše općine a koji bi mogli biti interesantni za turske privrednike i njihova ulaganja na području Srebrenika. Kako se na području općine Srebrenik već nalazi veći broj registrovanih firmi čiji vlasnici dolaze iz, nama prijateljske, Turske, kao i veći broj turskih državljana koji žive i rade na području naše općine i pije Arizona,



Detalj sa izložbe fotografija "SREBRENICA"

interes je tim veći za još ozbiljniju i čvršću saradnju u kome bi BIGMEV prezentirao turskim privrednicima potencijale naše općine, što bi moglo dovesti do otvaranja novih firmi i novih radnih mjesta. Predstavnici BIGMEV-a su pokazali interes i želju da uskoro posjete našu općinu i na licu mjesta se uvjere u sve prednosti koje Srebrenik zbog svog strateškog položaja, komunikacijske povezanosti, blizine granice EU te česti-



Direktor TIKa-e dr. Zufer Oruč i načelnik Buljubašić Sanel

tih i vrijednih ljudi, izdvaja od drugih krajeva. Tokom ove posjete delegacija općine je posjetila i novootvorenu - stalnu postavku fotografija "SREBRENICA - GALERIJA 11/07/95" koja je otvorena kako bi trajno podsjećala na genocid nad Bošnjacima u Srebrenici u ljeto 1995. godine. Na kraju dana se naša delegacija sastala i sa direktorom TIKa - Turske uprave za međunarodni razvoj i saradnju u BiH, Dr. Zufer Oruč-om. Načelnik Buljubašić je ukratko predstavio općinu Srebrenik i njene osnovne karakteristike i potencijale, a Dr. Oruč izrazio spremnost da vrlo brzo dođe u našu općinu, kako bi zajedno sa svojim saradnicima na licu mjesta sagledao privredne i turističke potencijale, kao i mogućnosti realizacije određenih projekata koje bi pomogla ova organizacija.

Predstavnik HILFSWERK-a i Roma TK-a u posjeti općini Srebrenik

Dana 01.02.2013.godine, općinu Srebrenik je posjetio predstavnik HILFSWERK-a, zajedno sa prof. mr.sci Mehmedom Mujićem, koordinatorom za romska pitanja pri Vladi TK-a i Ministarstvu obrazovanja, nauke, kulture i sporta TK-a. U razgovoru sa općinskim načelnikom Sanelom Buljubašićem, predložen je program stambenog zbrinjavanja Roma iz „Dekade Roma 2005 – 2015“, koji bi dijelom trebao biti implementiran i na području naše Općine. Predstavnik HILFSWERK-a je prezentirao projekat izgradnje stambenih objekata za pripadnike romske populacije, a koje bi finansirala ova humanitarna organizacija uz određeno učešće Općine u realizaciji ovog projekta. Učešće u realizaciji ovih projekata je iskazalo i Ministarstvo za ljudska prava i izbjeglice BiH koje je i glavni nosilac aktivnosti iz „Dekade Roma“. Načelnik Buljubašić se zahvalio na posjeti i izrazio spremnost Općine u podršci ovom značajnom projektu, u koji bi, u narednoj fazi, trebali uključiti i naselje Ravnuše sa projektom izgradnje vodovoda i dovođenja pitke vode za njegove stanovnike, Rumune - pravoslavce. Nakon sastanka u zgradi Općine, delegacija je posjetila romsko naselje u Špionici i o ovoj temi razgovarala



Detalj sa sastanka u kabinetu načelnika Buljubašića

sa Romima. Za zbrinjavanje svih romskih porodica na području naše Općine bilo bi potrebno izgraditi devet stambenih objekata, koje bi projektovao i gradio "HILFSWERK".

Konak Suljagića na listi nacionalnih spomenika

Predstavnici SGV-a TK-a posjetili načelnika Sanela Buljubašića

Dana 22.02.2013.godine, u kabinetu općinskog načelnika Sanela Buljubašića, održan je sastanak sa predstavnicima Srpskog građanskog Vijeća TK-a i SGV-a općine Srebrenik. Ispred SGV-a TK-a prisutni su bili Zoran Jovanović i Duško Liščić, a ispred SGV-a općine Srebrenik Milorad Blagić - predsjednik, Stojan Ostojić, Mićo Jovanović i Sretko Pantić. Sastanku je takođe prisustvovao i Novalija Dedić sa MP Tinja. Na sastanku se razgovaralo o stanju povratničke populacije u naselju Potpeć, kao i o projektima i planovima koje povratnici imaju namjeru realizovati u narednom periodu. Između ostalog tražena je pomoć i podrška Općine, a naročito u poboljšanju vodosnabdijevanja, rješavanju pitanja kanalizacije i drugih infrastrukturnih projekata u naselju i MZ-i Potpeć. Tom prilikom je istaknuto da su povratnici Srbi spremni uzeti aktivno učešće u svim projektima kao i maksimalno se uključiti u sve društvene tokove i dešavanja na području svoje MZ-e i općine Srebrenik, jer su svjesni da njihova vjekovna ognjišta nisu sigurne drugo do baš tu, u njihovom jedinom ognjištu. Osvrnuli su se takođe i na ostala povratnička naselja naše Općine u kojima žive pravoslavci, njihove probleme i istakli značaj podrške na poboljšanju stanja i svih drugih uslova života i u svim tim naseljima. Konstatovano je da je naša zajednička želja i cilj da se situacija povratnika čim prije popravi a općinski načelnik Sanel Buljubašić je iskazao potpunu spremnost Općine za podršku u realizaciji svih projekata koje povratnici odrede i prezentuju. „Svjesni smo teške ekonomske situacije i krize u svjetskim razmjerama, ali realnim pristupom i zajedničkim djelovanjem mogu se brojne stvari promijeniti na bolje“-istakao je Milorad Blagić. Kratko se govorilo i o konstituisanju Vijeća MZ Potpeć i njegovom radu i funkcionisanju, a koji bi trebao biti na dobrobit svih stanovnika ovog naselja te doprinijeti boljem i kvalitetnijem životu i suživotu svih stanovnika MZ Potpeć. Sastanak je završen konstatacijom da je Bosna i Hercegovina naša zajednička domovina, koju trebamo dodatno i sa ljubavlju izgrađivati, jačajući time i povjerenje, saradnju i suživot svih njenih stanovnika. A Srebrenik je vijekovima i uvijek bio primjer suživota i tolerancije, pa nam je to svima još i dodatna obaveza, ponos a i velika čast.



Konak Suljagića u Špionici

Graditeljsku cjelinu koja je proglašena nacionalnim spomenikom Bosne i Hercegovine čine konak sa pratećim privrednim objektima (pušnica ili sušara, magaza, hambar i koš za kukuruz). Prema tipologiji dr. Muhameda Kadića, konak pripada tipu tzv. katne kuće sa prepustom. Izvorni objekt imao je dva kata, od kojih je prizemlje bilo visine 3 m. Prizemlje objekta je zidano masivnim kamenim zidovima debljine cca 70-80 cm. Ulazna dvokrilna drvena vrata dimenzija cca 1,40x2,20 m su lučno završena i nalaze se na jugoistočnoj strani kuće. Ulazna vrata kuće su napravljena od hrastovoga drveta. S unutrašnje strane vrata, nalazi se mandal, masivna hrastova greda koja se horizontalno užljebljuje u kameni zid, sa strana. Drvenim stubištem pristupa se na kat koji je naknadno dograđen 50-ih godina XX stoljeća. Drugi kat sastoji se od središnjega prostora divanhane i četiri sobe. U konstruktivnom smislu, etaža drugoga kata ima tri trakta (isto kao i prizemlje): sjeveroistočni sa dvije sobe, središnji (hodnika i divanhane) i jugozapadni trakt u kojemu se nalaze dvije sobe. Pored objekta Konak Suljagića nalaze se i prateći (privredni) objekti: pušnica (sušara) za šljive, magaza, hambar, koš za kukuruz i štala. Svi navedeni objekti su smješteni u avliji koja je bila ograđena daskama (tarabom). Osim navedenih objekata, oko kuće u avliji i izvan nje nalazili su se kokošinjac, nužnik i bunar. Bunar se nalazio u bašči iza kuće i do njega se dolazilo popločanom kaldrmom. U narednom biltenu ćemo opširnije predstaviti Konak Suljagića sa pratećim objektima koji se nalazi u Donjoj Špionici, te koji je od novembra 2012.godine na listi zaštićenih nacionalnih spomenika Bosne i Hercegovine.

Delegacija općine Srebrenik povodom Božića posjetila Župu Svetoga Josipa u Špionici



Hodžić Damir, župnik fra Ikić Miroslav i načelnik Buljubašić Sanel

Dana 25.12.2012. godine, općinski načelnik Buljubašić Sanel sa najbližim saradnicima je, povodom velikog katoličkog blagdana Božića, posjetio Župu Svetoga Josipa u Špionici te razgovarao sa župnikom fra Ikić Miroslavom i fra Opačak Ivanom. Fra Miroslav i fra Ivan su načelniku Buljubašiću poželjeli srdačnu i toplu dobrodošlicu i zahvalili se na posjeti, a tokom razgovora su predstavili Župu Svetog Josipa u Špionici. Zahvalili su se i na pomoći Općine u realizaciji nekih dosadašnjih projekata u ovoj Župi, izrazivši nadu i u nastavak njene daljnje podrške. Načelnik Buljubašić se zahvalio na riječima dobrodošlice i ljubaznosti kojom su ih dočekali, izrazivši spremnost Općine Srebrenik i njega osobno, da se i dalje nastavi praksa dobre saradnje i pomoći svim vjerskim zajednicama koje se nalaze na području naše Općine. Zajednička konstatacija je da vjerski blagdani svih konfesija, pa i Božić, treba da zbližavaju građane i stvaraju povjerenje jednih prema drugima, da šire zajedništvo, ljubav i međusobno uvažavanje, a to i jeste bit i suština svih blagdana. Tokom razgovora je istaknuto da ljepota naše domovine Bosne i Hercegovine, između ostalog, jeste i u zvonima sa crkvenih tornjeva, kao i zvuku ezana sa minareta džamija. Sastanak je trajao skoro sat vremena a načelnik sa saradnicima je počašćen i nezaobilaznim božićnim slasticama i kolačima.

Delegacija općine Srebrenik povodom Božića posjetila parohiju Špioničko Jaseničku

Dana 07.01.2013.godine, predsjedavajuća OV-a Srebrenik Veselić Vesna i općinski načelnik Sanel Buljubašić sa saradnicima, su povodom najvećeg pravoslavnog praznika Božića, posjetili parohiju Špioničko - Jaseničku i jereja pravoslavne crkve, Dragana Pavlovića u Špionici. Jerej Pavlović je, zajedno sa crkvenim odborom, priredio srdačnu i toplu dobrodošlicu dragim gostima u novoobnovljenoj zgradi crkvene opštine. Zajedno sa domaćinima, načelnik je posjetio,



Delegacija općine Srebrenik u parohiji Špioničko-Jaseničkoj

obišao i razgledao i staru pravoslavnu crkvu u Špionici, izgrađenu pred prvi svjetski rat, daleke 1914. godine, jednu od četiri crkve koje pripadaju parohiji Špioničko - Jaseničkoj, a koje se nalaze na području naše općine. Tokom razgovora je istaknuto da je podrška općine Srebrenik radu svih vjerskih zajednica uvijek postojala i ta praksa će se nastaviti i ubuduće, a ovom prilikom je iskazana i spremnost u pomoći na realizaciji određenih projekata koje vodi ova parohija. Tokom razgovora je istaknuto da je suživot i međusobno poštovanje pripadnika različitih konfesija, koji žive na području općine Srebrenik i BiH, jedini ispravan put.

U Srebreniku održan tradicionalni Božićni koncert

Dana 28.12.2012.godine, u organizaciji Hrvatskog kulturnog društva „Napredak“ Srebrenik, u velikoj sali srebreničkog Doma kulture, održan je tradicionalni Božićni koncert, upriličen povodom jednog od najvećih katoličkih blagdana. Na početku koncerta prigodne božićne čestitke uputili su općinski načelnik Sanel Buljubašić, Filka Veselić, predsjednica HKD „Napredak“ Srebrenik i župnik fra Miroslav Ikić, župnik Župe Špionica. U nastavku programa, pred oko 300 posjetilaca, nastupili su: "Iuventus salinarum" zbor mladih pri Franjevačkom samostanu u Tuzli, pod ravnanjem Zlatka Špoljarevića i tamburaši HKD "Napredak" Tuzla. Posjetioци su imali priliku uživati u prigodnim božićnim pjesmama, ali i narodnim pjesmama iz Slavonije i Bosne i Hercegovine.



Detalji sa Božićnog koncerta u Srebreniku

BZK „Preporod“ održao izložbu levhi i promociju knjige



Detalj sa promocije knjige

Dana 30.11.2012. godine u organizaciji BZK "Preporod" OO Srebrenik, u kino sali Doma kulture u Srebreniku, održana je izložba levhi autora Zehrudin ef. Muhedinovića, kao i promocija knjige "Bošnjaci-muslimani u odbrani Dubrovnika 1991.-1995. godine" autora Tursunović Kemala Zmajke. Gospodin Tursunović je naš sugrađanin, rođen je u Tinji, općina Srebrenik, a već dugo živi i radi u Dubrovniku. Sve do penzionisanja je radio u policiji u PU Dubrovnik i do sada je napisao pet knjiga. Promotori knjige su bili: Jerinić Mato, poznati književnik iz Dubrovnika i recenzent knjige i Izet Spahović, predsjednik Kulturnog društva Bošnjaka "Preporod" iz Dubrovnika, a biografiju autora je predstavio njegov prijatelj Dževad Brašnjić iz Tinje. Knjiga je izašla u izdanju Kulturnog društva Bošnjaka "Preporod" iz Dubrovnika i donosi podatke o Bošnjacima koji su sudjelovali u Domovinskom ratu u odbrani Dubrovnika od 1991. do 1995. godine. Kako je prilikom predstavljanja knjige istakao autor, knjiga je važna za Bošnjake koji žive i rade u Dubrovniku i koji su sudjelovali u Domovinskom ratu na bilo koji način, ali je važna i za Republiku Hrvatsku, jer govori i o nacionalnoj manjini Bošnjaka koja je dala značajan doprinos u odbrani Hrvatske. Književnik i novinar Mato Jerinić kazao je da ova knjiga pokazuje ono što svi objektivni i dobronamjerni stanovnici Dubrovnika znaju, a to je da su Bošnjaci - muslimani utkani u sve pore života Dubrovnika te su njegov neotuđivi dio i njihova ljubav prema gradu jednako je duboka kao i ljubav Hrvata i ostalih mu stanovnika. Kao što je sam autor istakao, posebno ga je obradovalo prisustvo načelnika općine Srebrenik Sanela Buljubašića i ranijeg načelnika Mehmeda Bajrektarevića, kojima je autor Tursunović ovom prilikom, kao poklon, uručio po jednu svoju potpisanu knjigu. Neposredno



Zehrudin ef. Muhedinović ispred izloženih levhi

prije zvaničnog otvorenja izložbi levhi održana je projekcija kratkog dokumentarnog filma o Zehrudinu ef. Muhedinoviću, višestruko nagrađivanog filma koji su uradili učenici Prve osnovne škole Srebrenik. Izložbu levhi posjetioci su mogli pogledati tokom narednih sedam dana u holu Doma kulture u Srebreniku. Ljepota levhi, koje radi i slika Muhedinović, je

nadaleko poznata, a neke od njegovih levhi su i danas izložene u Beču, u stalnoj postavci Instituta za dijalog - "FRIEDE", a već je izlagao i u Hamburgu, kao i u mnogim gradovima i mjestima u Bosni i Hercegovini. Inače obje manifestacije su bile izuzetno posjećene a posebno treba istaći značajno prisustvo učenika i mladih osoba, koje su sa dosta pažnje pratile izložbu i promociju knjige.

Prof. dr. Omer Ibrahimagić promovisao knjigu "Bosanski identitet i suverenitet"

Dana 13.11.2012.godine, u organizaciji Bošnjačke zajednice kulture "Preporod" OO Srebrenik, u Plavoj sali Doma kulture u Srebreniku, održana je promocija nove knjige autora, akademika prof. dr. Omera Ibrahimagića, "Bosanski identitet i suverenitet". O ovom vrlo značajnom naučnom djelu govorili su promotori: Dr. Omer Hamzić iz



Ova knjiga je nastajala skoro 20 godina

Gračanice i Mr. sci. Nermin Tursić iz Srebrenika. Promotori su istakli da je ovo djelo kapitalno u naučnom i intelektualnom smislu, i zasigurno jedno od rijetkih na ovim prostorima koje daje tako sažetu sliku o 1.000 godina postojanja, identiteta i suvereniteta Bosne i Hercegovine. O samoj knjizi i njenom nastajanju, kao i tematskim cjelinama iste, govorio je i profesor Ibrahimagić, istakavši da je ovo njegovo djelo nastajalo skoro dvadeset godina, jer je ono ustvari sublimacija njegovih tekstova i radova koji su nastajali u posljednje dvije dekade. Kako je istakao, u ovoj knjizi su navedeni i realni fragmenti okvira budućeg "Nacionalnog programa Bošnjaka" koga na žalost



Detalj sa promocije knjige

do sada nismo imali. Zadovoljan posjetom i pažnjom publike, profesor Ibrahimagić se zahvalio svima prisutnima a posebno promotorima, istakavši da je, kao i uvijek do sada, sretan kada dođe u Srebrenik, jer je još kao dječak, između dva svjetska rata, sa svojom majkom često dolazio kod svoga dajdže Ademage Koprića i svoje mnogobrojne rodbine iz Rapatnice. Nakon promocije skoro svi prisutni su u kino sali pratili tribinu i predavanje prof. Mehmedalije Hadžića, kao i kulturno zabavni program u organizaciji Medžlisa IZ Srebrenik, a u povodu nove 1434. hidžretske godine koja počinje u srijedu, nakon akšama. Na tribini su svim pripadnicima islamske vjeroispovijesti čestitali Novu 1434. hidžretsku godinu.

Srebrenički mladi eko lideri dobili certifikate



Dobitnici certifikata u okviru projekta "Mladi eko lideri"

Sredinom decembra 2012. godine, u Plavoj sali Doma kulture Srebrenik, tridesetak mladih sa područja općine Srebrenik koji su uspješno završili šestosedmičnu obuku u okviru projekta „Mladi eko lideri“, dobilo je certifikate, čime je svečano obilježen završetak projekta. „Mladi eko lideri“ je USAID-ov projekat finansiran od strane američkog naroda, kojeg realizuje PRONI Centar za omladinski razvoj iz Brčkog u saradnji sa Centrom za održivi razvoj (CSD), Centrom za energetske efikasnosti (CEEFF), Omladinskom informativnom agencijom (OIA), te nosiocem projekta YouthBuild International iz Bostona. Projekat „Mladi eko lideri“ je obuhvatio 28 općina na području Sjeveroistočne Bosne, među kojima se našao i Srebrenik. Navedeni projekat ima za cilj da mladim ljudima omogući sticanje novih znanja iz oblasti liderstva, tehničkih vještina iz ekologije, zaštite okoliša i energetske efikasnosti, uz neizostavan praktičan rad na terenu. Krajnji cilj je nakon završene obuke nastaviti djelovanje na zaštiti okoline i upravljanja njenim resursima. U okviru projekta planirana

je i izrada solarnih lampi za 800 domaćinstava iz ruralnih područja. „Mladi eko lideri“ iz Srebrenika su u okviru šestosedmične obuke stekli znanja iz domena liderstva, timskog rada, komunikacije, ekologije, energetske efikasnosti, te su također naučili izrađivati Taa Bora solarne lampe kao i mnoge druge praktične aktivnosti. Pored izrade lampi mladi Srebrenika su temeljito restaurirali binu u kino sali Doma kulture u Srebreniku. Također mladi Srebrenika su kao poklon svome gradu prefarbali radijatore, ulazna vrata u kino salu te još neke drvene površine u Domu kulture. Pored toga na glavnoj autobuskoj stanici u Srebreniku postavili su i kontejner za selektivno odlaganje otpada, te proizveli 50 solarnih lampi koje će preko Crvenog krsta Srebrenik biti uručene socijalno ugroženim porodicama širom općine Srebrenik. Mladi koji su prošli navedenu obuku imaju priliku da budu jedni od 80 mladih koji će biti izabrani i koji će proći i specijalizovane obuke za razvoj poslovnih ideja iz navedenih oblasti, nakon čega će se za 10 najboljih ideja dodijeliti novčana sredstva u iznosu od 1000 USD.

Održan koncert pod nazivom "Pečat u srcu"

Dana 29.01.2013.godine u Domu kulture u Srebreniku, pred oko 800 posjetioca, održan je koncert pod nazivom "Pečat u srcu" u organizaciji Udruženja mladih "ZEFIR" Srebrenik. Publika je u dva sata programa uživala u pjesmama: „Aman“, „Hanuma“, „Žute dunje“, „U Stambolu na Bosforu“ i dr. u izvedbi ansambla "Zefir", specijalnih gostiju Jasmina Hasića i Mirze Selimovića, kao i gosta iznenađenja Muhameda Mujkanovića. U razgovoru nakon koncerta sa posjetiocima ovog spektakla otkrili smo da u Srebreniku do sada ovako ništa nije viđeno. –"Bilo je fenomenalno. Kvalitetan zvuk, svjetlosni efekti, odlične interpretacije specijalnih gostiju i ansambla Zefir. Jedva čekam ponovo neku manifestaciju u organizaciji ovog ansambla. Ovi mladi ljudi su postali ambasadori naše Općine." – kazao nam je jedan od posjetitelja ovog koncerta. Večer sevdaha je organizovalo Udruženje mladih "Zefir" pod pokroviteljstvom Općine Srebrenik. Organizatori su uz zahvalnost općini i načelniku općine, Sanelu Buljubašiću, izrazili nadu da će



Detalj sa koncerta "Pečat u srcu"

ovakvih manifestacija biti i ubuduće u našem gradu, te da će ovaj "Pečat u srcu" postati tradicionalan koncert.

Promocija Udruženja mladih „Zefir“ Srebrenik

Dana 18.12.2012. godine, u Plavoj sali Doma kulture u Srebreniku, održana je press konferencija Udruženja mladih „Zefir“ Srebrenik, na kojoj su predstavljene dosadašnje aktivnosti udruženja te su, u kratkim crtama, javnosti predložene ideje kojima će se navedeno udruženje voditi kako bi ostvarilo sebi postavljene ciljeve. Ansambl „Zefir“ Srebrenik je organizacija koja je osnovana 2010. g. i kao takva radila je u okviru Medžlisa Islamske zajednice (MIZ) Srebrenik. U početku je postojala samo horska sekcija, koja je kasnije obogaćena sa orkestrom. U ovakvom sastavu postignuti su veoma zapaženi rezultati. UM „Zefir“ koji je ovom prilikom predstavljeno je novoosnovano udruženje koje broji oko 60 aktivnih članova, starosnog uzrasta od 7 do 50 godina. Prevashodni cilj udruženja je da okupi mlade oko ideje očuvanja i interpretacije islamske duhovne muzike kao i tradicionalne pjesme u bošnjaka, „sevdalinke“. PR udruženja Refija Kavgić je na press konferenciji istakla: -„Uloga UM „Zefir“ je usmjerena na okupljanje mladih naše općine u cilju korisnog druženja i prevencije od neprihvatljivog ponašanja, kao i u cilju očuvanja i njegovanja tradicionalne pjesme sevdalinke i islamske duhovne muzike.“ Na navedenoj press konferenciji prisutnima se obratio i predsjednik UM „Zefir“ Srebrenik, profesor muzike Jasmin Brašnjić. On nije krio veliko zadovoljstvo uspjehom ove mlade organizacije koja je u dosadašnjem radu, u okviru MIZ-e Srebrenik, uspješno realizovala niz projekata kao što su koncerti povodom muslimanskih praznika bajrama, humanitarni koncerti kao i smotra horova islamske duhovne muzike. „Posebno se ponosimo humanitarnim koncertom koji smo organizovali u BKC Tuzla, a kojim smo u jednom malom dijelu uspjeli pomoći našem sugrađaninu Samiru Okiću, a istovremeno smo



Detalj sa promocije UM "Zefir" Srebrenik

predstavili Srebrenik široj javnosti TK-a. Naši nastupi su praćeni i od strane nekoliko medija, tako da odgovorno možemo istaći da je naš rad prepoznat i van granica naše zemlje, jer smo već ostvarili kontakte i imali ponude za nastupe u inostranstvu ali, zbog svima nama poznate ekonomske situacije, nismo bili u mogućnosti gostovati izvan BiH. Udruženje će i u buduću nastaviti da čuva sevdalinku od zaborava, te da interpretira islamsku duhovnu muziku ali i da bude centar oko kojeg će se okupljati mladi te svoje ideje sprovoditi u djelo. Aktivnosti udruženja će se usmjeriti i ka jačanju veza sa ostalim sličnim udruženjima na prostoru BiH i regiona, kako bi, na najbolji način predstavili i općinu Srebrenik.“ - istakao je Brašnjić.

Lejla Zahirović pobjednica „Dječijeg festivala zabavne muzike Srebrenik 2012“

Učenica OŠ „Duboki Potok“ Lejla Zahirović, pobjednica je „Dječijeg festivala zabavne muzike Srebrenik 2012“, koji je krajem decembra 2012.g., održan u Sportskoj dvorani u organizaciji JU „Sportsko-rekreativni centar“ Srebrenik. Ona je u konkurenciji šest škola i osam takmičara prema ocjeni stručnog žirija bila najbolja te tako zaslužno došla do pobjede. Izvodila je pjesmu „Molitva“ s kojom je Marija



Detalj sa prošlogodišnjeg nastupa Lejle Zahirović

Šerifović 2007. godine pobijedila na Eurosongu. Drugo mjesto pripalo je učeniku OŠ „Tinja“ Semilu Dediću s pjesmom „Možda nebo zna“, dok je treće mjesto osvojila učenica „Prve osnovne škole“ Elma Junuzović sa pjesmom „S kim čekaš dan“. Zapažen nastup također su imali i ostali učenici i to Ajla Dedić iz OŠ „Podorašje“, zatim Ensar Hodžić iz OŠ „Rapatnica“, Azur Hogić i Aida Šiljić iz „Druge osnovne škole“ te Rasim Rizvanović iz „Prve osnovne škole“. Najboljim učenicima uručeni su prigodni poklon paketi, pehari i diplome. Specijalni gost „9. Dječijeg festivala zabavne muzike“ bio je naš sugrađanin Mirza Selimović, koji je, također kao osnivač, učestvovao nekada na jednom od ovih festivala, dok je ovu večer bio član žirija, zajedno sa predstavnicima medijskih kuća iz Srebrenika.

Obilježena 13. godišnjica Gradskog teatra Srebrenik

U povodu 13. godišnjice Gradskog teatra Srebrenik, početkom novembra 2012. g., u velikoj sali srebreničkog Doma kulture, održana je prigodna rođendanska svečanost pod simboličnim nazivom „Ti si moj 13-ti broj“. U sklopu svečanosti zaslužnim pojedincima uručena su priznanja i zahvalnice, a priređen je i muzičko-dramski performans u kojem su članovi Gradskog teatra prezentirali muziku, folklor, humor i ostalo svoje bogato kulturno-umjetničko stvaralaštvo. Kako je istaknuto na prigodnoj rođendanskoj svečanosti, u novembru 1999. godine grupa entuzijasta na čelu s Fikretom Mujkićem odvažila se da na scenu postavi prvu amatersku pozorišnu predstavu u Srebreniku. Ubrzo nakon toga osnovali su Alternativni teatar, koji je, korak po korak, prerastao u Gradski teatar s oko 300 volontera. Prije pet godina, u sklopu Gradskog teatra Srebrenik oformljen je i folklorni ansambl, a nešto kasnije i muzička i plesna sekcija, koje su, zajedno s dramskom grupom, u proteklom periodu imali preko 500 nastupa u zemlji i inostranstvu.



Detalj sa obilježavanja 13.-godišnjice GTS-a

Promovisana zbirka pjesama „Život mladosti“

U organizaciji BZK "Preporod" Srebrenik, u plavoj sali Doma kulture Srebrenik, sredinom oktobra 2012.g., održana je promocija zbirke pjesama "Život mladosti", autora Muje Bjelića iz Srebrenika. Kako je istakao promotor prof. Dževad Nuhanović, u zbirci poezije dominiraju pjesme posvećene sevdahu, porodici, prirodi i životu u neka davna vremena, pri čemu je teško napraviti ostru razliku između idile prirode i idile porodice. „Ovom zbirkom pjesama autor otvara svoju dušu i srce, te se vraća u mladost koja je bila vječita pjesma i sevdah razvijen pod pendžerom voljene. Uz sevdah, mladalačke snove i prohujašu mladost, pjesme Muje Bjelića prožete su i socijalnim odnosima i porodičnim životom“-istakao je Nuhanović. Uz poeziju, autor zbirke već više od 40 godina iskazuje podjednaku ljubav i prema slikarstvu i skulpturi. Svoje skulpture i radove izlagao je u svim značajnijim galerijama na prostoru Bosne i Hercegovine.



Detalj sa promocije knjige "Život mladosti"

Promocija časopisa „Baština sjeveroistočne Bosne“



Dana 09.02.2013.godine, u Plavoj sali srebreničkog Doma kulture, održana je promocija 1. i 2. broja časopisa „Baština sjeveroistočne Bosne“. O časopisu, čiji je izdavač JU „Zavod za zaštitu kulturno-istorijskog i prirodnog naslijeđa“ TK-a, na promociji su govorili dr. Edin Mutapčić, mr. Rusmir Djedović i prof. Almedin Ibrimović. „Bogato kulturno-istorijsko i prirodno naslijeđe TK-a i sjeveroistočne Bosne veoma je slabo istraženo i prezentirano kulturnoj i široj javnosti. Imajući u vidu tu činjenicu, pokrenuli smo realizaciju projekta izdavanja stručnog časopisa, zahvaljujući kojem već više od 2 godine veliki broj mladih istraživača istražuje i prezentira široj javnosti sve aspekte višemilenijske kulture života i baštine TK-a i sjeveroistočne Bosne“, istakao je Mutapčić. Uz prezentiranje brojnih tema obrađenih u prva dva broja časopisa, promotori su govorili i o aktuelnoj problematici zaštite kulturno-istorijskog i prirodnog naslijeđa, pri čemu su posebno ukazali na problem nedostatka novca za istraživanje brojnih arheoloških nalazišta na ovom području.

Promocijom stabla „Bosanska dinastija Kotromanića“ zvanično otvoreni Dani povelje 2013



Porodično stablo Kotromanića predstavio je prof.dr. Enver Imamović

Dana 08.02.2013.g., u organizaciji općine Srebrenik i JU „Centar za kulturu i informisanje“ Srebrenik, u Plavoj sali Doma kulture, održana je promocija porodičnog stabla «Bosanska dinastija Kotromanića», autora prof. dr. Envera Imamovića. Dugogodišnji istraživački rad profesora Imamovića rezultirao je jedinstvenim djelom slikovnog i tekstualnog sadržaja u kojem je prikazana srednjovjekovna prošlost Bosne kroz razdoblje od oko 700 godina. Na način dopadljiv i razumljiv za djecu, intelektualce, akademike, na stablu je prikazano 14 vladara. Njihovi likovi skinuti su sa autentičnih, postojećih dokumenata, dok se u tekstu navodi 70 članova dinastije Kotromanić. Kako je istaknuto na promociji porodično stablo "Bosanska dinastija Kotromanića" lična je

karta Bosne, umjetničko djelo, slika hrasta sa članovima dinastije Kotromanića koji su više od 700 godina vladali srednjovjekovnom bosanskom državom ili, kako naglašava autor Imamović, svjedočenje da je bosanska država jedna od najstarijih država Slavena, što su u svojim djelima potvrdili i neki od najznačajnijih historičara iz okruženja. Ne bez razloga kao podloga porodičnog stabla izabran je hrast, o simbolici hrasta govorio je i prof. Imamović, rekavši da je to visoko stablo duboko ukorijenjeno u tlo. Hrast – drvo poznato po izdržljivosti i dubokim korijenima kakve Bosna i ima. U nastavku prezentacije Imamović je posebno istakao zanimljivost da su se sa bosanskog dvora ženili i udavali na druge europske dvorove, te su recimo Bosanke vladale Europom. Kao primjer naveden je slučaj princeze Elizabete koja je bila kraljica ondašnje Ugarske, sadašnje Mađarske. Prof. Imamović je rekao da je ovo djelo svojevrsni rodni list Bosne i Hercegovine koji bi trebao da nađe svoje mjesto u obrazovnim institucijama, prije svega školama, a tokom svog izlaganja dotakao se posebno i događaja od prije 680 g., kada je pod zidinama Starog grada Srebrenika izdata Povelja bosanskog Bana Stjepana II Kotromanića. Oko 700 godina postojanja Bosne je evidentirano i dokumentirano, a od prvoga spominjanja bana do danas je oko 1200 godina. Toliko traje država Bosna. Iz izvedene geneze vidljivo je da je Bosna bila samostalna država, sa vlastitim vladarima, dvorom, jakom diplomatskom službom, vojskom, vlastitim novcem. Posebno se izdvajaju periodi Kulina Bana, kada je nastala Povelja dubrovačkim trgovcima koja se označava i kao rodni list srednjovjekovne bosanske državnosti, vladavina Stjepana II Kotromanića kada je Bosni pripojen Hum, današnja Hercegovina, te oblasti Livanjskog, Duvanskog i Glamočkog polja, čime su granice Bosne dovedene do tri rijeke - Save, Drine i Cetine te vladavina Tvrtka I Kotromanića (1353-1391) kada teritorijalni razvoj srednjo-vjekovne Bosne doživljava kulminaciju opsega i značaja u srednjem vijeku. Izvršenim proširivanjima Bosna je tada bila najveća i najjača država na jugoistoku Balkana, a njen vladar Tvrtko je bio najveći bosanski vladar.“ istakao je prof. Imamović. U nastavku programa u holu Doma kulture održana je izložba slika iz fundusa Otvorenog grada umjetnosti Srebrenik.

Održana izložba „Kulturno-historijsko i muzejsko blago Srebrenika“

Dana 11.02.2013.g, u Domu kulture u Srebreniku, otvorena je zanimljiva izložba „Kulturno-historijsko i muzejsko blago Srebrenika“. Izložbu je otvorio općinski načelnik Sanel Buljubašić, koji je ovom prilikom istakao: - „Pred nama su stari spisi i dokumenti, stari novac i oružje, te brojni stari predmeti, koje su vrijedni kolekcionari Svjetlan Bešić, Mirza Suljagić, Dževad Nuhanović, Edin Mutapčić, Esad Dedić te udruga „Stara sinija“ iz Gornjih Hrgova, koja je predstavila starine iz „Etno dvorišta Marojević“, godinama skupljali, odvajajući za to, osim vremena i truda, i znatna novčana sredstva. Nadamo se da će ova izložba starina plijeniti pažnju svih ljubitelja starina na ovom općinskom području te da će je građani, u većem broju, posjetiti u narednih 7 dana, do kada će izložba biti otvorena“. Na izložbi su predstavljeni brojni stari kućanski aparati, stari predmeti, oružje staro nekoliko stotina godina, razni stari medaljoni i raznovrsne papirne novčanice i kovanice. Među brojnim eksponatima posebno je zanimljiva turska sablja s filigranskim srebrenim natpisom iskovan 1.803. godine, pištolji iz perioda Austro-Ugarske i stari sat marke „longines“ star više od 100 godina, ručno pisani Kuran iz 17 stoljeća i dr. Zanimljivo je da se u zbirci novčanica i starih medaljona nalazi



i bogata kolekcija papirnog novca koji je još u opticaju u preko 150 zemalja svijeta. Izložba starina rezultat je višedecenijskog upornog i strpljivog rada gorenavedenih kolekcionara, koji prije svega žele sačuvati od zaborava brojne stare predmete koji su bili u svakodnevnoj upotrebi u domaćinstvima naših nena i djedova, te upoznati, prije svega, mlade sa našim vrijednim kulturno-historijskim blagom.

Izložba fotografija religijskih i sakralnih eksponata vjera



Dana 11.02.2013.g, u Domu kulture u Srebreniku otvorena je izložba fotografija religijskih i sakralnih eksponata vjera u Bosni i Hercegovini, čiji je autor don Ivan Ravlić, župnik u Posavskoj Mahali kod Odžaka. Na početku izložbe prisutnima se obratio autor izložbe don Ivan Ravlić, koji je istakao: - „Ideja o izložbi sakralnih i religioznih eksponata vjera na teritoriji BiH dugo je sazrijevala u meni. Ova izložba je prvi put postavljena 2008. g. u Sarajevu. Izložba je trajala punih mjesec dana, a svakog su je dana posjećivali učenici nekoliko škola, dnevno je bilo i do 10.000 posjetilaca. Na izložbi koja je dosad obišla mnoga mjesta u BiH i Hrvatskoj moglo se pogledati oko 300 vjerskih eksponata i isto toliko fotografija katoličkih, pravoslavnih, islamskih i židovskih sakralnih objekata u BiH i prva je ove vrste ikad otvorena u BiH. Na osnovu iskustava ove izložbe 2008. g. izdat je i katalog vjera »Sakralni i religiozni eksponati vjera na teritoriju BiH«, u kojem se nalazi po 150 fotografija svake 4 vjere i vjerske zajednice. Ovo je izložba dijaloga i ekumenizma, a moramo priznati da je toga danas malo i svi mi trebali bi na tome više poraditi. Na kraju, generalni cilj izložbe je povezati i ujediniti narode u njihovoj kulturnoj raznolikosti“. Izložbu je otvorio općinski načelnik Sanel Buljubašić, koji je istakao da je počašćen posjetom jednog ovakvog čovjeka i vjerskog službenika, koji ovom izložbom jasno poručuje da se u BiH može živjeti „jedan uz drugog a ne jedan pored drugog“ te da je ovo lijepa prilika da naši građani, a posebno učenici, kroz eksponate sa izložbe upoznaju druge i drugačije, ali i da cijene i poštuju svoje.

Press konferencija „Dani povelje 2013“ i nastup kulturno umjetničkih društava

Pored ljubavi prema porodici imamo i jednu veliku ljubav prema Starom gradu Srebreniku, gradu za kojeg možemo reći da je nosilac kontinuiteta života zadnjih 700 godina.“ Ovim riječima obratio se prof. dr. Edin Mutapčić na konferenciji za novinare povodom obilježavanja manifestacije „Dani povelje 2013“ u Srebreniku. Konferencija je održana dana 14.02.2013.godine u 12 sati u Plavoj sali Doma kulture u Srebreniku, a prisutnima su se obratili općinski načelnik Sanel Buljubašić i članovi organizacionog odbora prof. dr. Edin Mutapčić i profesor Sadil Mehmedović. „Dani povelje su samo uvertira onoga što je planirano tokom godine... planirano je i obilježavanje otvorenog dana umjetnosti sa pojačanim intezitetom“. – rekao je profesor Mutapčić dodavši da je neophodna izgradnja muzejsko-galerijske zbirke. Manifestacija je praćena i listom „Ševak“ čiji urednik profesor Sadil Mehmedović naglašava da se „Danima povelje“ pokušava vratiti stari sjaj grada Srebrenika. „Srebrenik ima svoju simboliku kao grad prvog bosanskog vladara...grad koji ispisuje jednu zanimljivu priču u kojoj ima mjesta za sve.“- istakao je profesor Mehmedović. Istog dana u 17 sati HKD „Napredak“, SKD „Prosvjeta“ i BZK „Preporod“ Srebrenik, su se posjetiocima predstavili bogatim kulturno-umjetničkim programom, u sklopu kojeg je najveći aplauz izazvao splet pjesama i igara iz BiH i zemalja okruženja.



Proslavljen 680. rođendan Starog grada Srebrenika



Sanel Buljubašić: -Stari grad Srebrenik promovisati i van granica BiH

Dana 15.02.2013.godine, u Kino sali Doma kulture u Srebreniku, održana je centralna svečanost manifestacije "Dani povelje 2013", kojom se obilježava 680.-ti rođendan povelje Stjepana II Kotromanića, kao i 680 godina od prvog pomena Srebrenika. Na početku svečanosti promovisana je nova web prezentacija bosanskog kraljevskog grada Srebrenika i turističkih kapaciteta i potencijala općine Srebrenik. Nova web stranica, koju možete pogledati na sljedećoj adresi: <http://starigrad.srebrenik.ba> će se tematski baviti promocijom kulturne baštine Općine Srebrenik kao i ostalih turističkih kapaciteta i potencijala ove Općine. Brojnim prisutnim se prvo obratio općinski načelnik Sanel Buljubašić, koji je između ostalog izjavio:- U Srebreniku se večeras obilježava 680. godina Povelje bosanskog bana Stjepana II Kotromanića, dokumenta pisanog pod Starim gradom Srebrenikom u formi ugovora sa Dubrovačkom Republikom. Stari Grad i srednjovjekovna Povelja su jedan od historijskih stubova

bosanske državnosti i onaj ko to ne poštuje ne nosi dobru poruku za budućnost. Povelju i Stari grad Srebrenik želimo promovisati i van granica Bosne i Hercegovine kao jedan od povijesnih stubova bosanske državnosti, a naš kratkoročni cilj je da se jedna sjednica Predsjedništva BiH održi na Starom gradu. Takođe ove godine općina Srebrenik će biti domaćin velikog naučnog skupa koji će za cilj imati Povelju i Stari grad Srebrenik te njegov značaj za državu Bosnu i Hercegovinu". U nastavku svečanosti predstavljen je roman „Molim te zapiši“ autora Jasmina Imamovića, dugogodišnjeg načelnika Općine Tuzla. Roman je bitan za Srebrenik jer se događaji, opisani u romanu, odvijaju pod Starim gradom Srebrenikom. O romanu kao i historijskom kontekstu, u kojem je smještena priča navedenog romana, govorio je sam autor Jasmin Imamović, dr. Julijana Matanović, književnik Ahmed Burić i Zoran Simić, predstavnik izdavača W.B.Z. Zagreb te akademik prof.dr. Dubravko Lovrenović.



Detalj sa promocije romana "Molim te zapiši"

Otvorena izložba slika sa Međunarodne likovne kolonije Majeveca 2012



Nedret Fazlić, Sanel Buljubašić i Svjetlan Bešić (foto:vodic.ba)

U sklopu tradicionalne kulturne manifestacije "Dani povelje 2013", koja se svake godine u februaru održava u Srebreniku, baštineći kulturno-historijsko nasljeđe kraljevskoga grada Srebrenika, dana 14.02.2013. u 18 SATI u holu Doma kulture Srebrenik, otvorena je izložba slika nastalih na „Međunarodnoj likovnoj koloniji Majeveca 2012“. Za vrijeme boravka i stvaranja, od 19. do 25. juna 2012. godine, u prelijepom ambijentu etno – parka, vlasnika Svjetlana Bešića, koji se nalazi na vrhu planine Majevice, na nadmorskoj visini od 720 metara, 12 likovnih umjetnika iz Makedonije, Srbije, Hrvatske,

Austrije i BiH su iza sebe ostavili 25 slika slikanih raznim tehnikama te 2 kiparska rada. –„Vjerujem da je kvalitet izloženih radova nešto što Srebrenik do sada nije imao priliku da vidi, tako da s pravom možemo reći da ova međunarodna likovna kolonija opravdava svoje postojanje. Većina umjetnika sa prošle likovne kolonije nije mogla doći na ovo otvorenje, ali u kontaktu smo i prenosim Vam njihove pozdrave-istakao je Svjetlan Bešić. Izložbu je proglasio otvorenom općinski načelnik Sanel Buljubašić, koji je između ostalog kazao: - „Svjetlan Bešić je 2008. godine pokrenuo likovnu koloniju s imperativom spašavanja prirodnih ljepota planine Majevice i historijskog blaga koje predstavlja Stari grad Srebrenik, i u tome istrajava do danas a nadam se, naravno uz pomoć općine Srebrenik, koju je imao i do sada, da će nastaviti sa održavanjem kolonije i ubuduće. Srebrenik se sa početkom ove godine nametnuo kao najaktivniji i najzastupljeniji grad na polju kulture u cijeloj regiji. To je velika čast, ali i obaveza da ovdje radimo mnogo više, mnogo odgovornije i ozbiljnije. Umjetnička kolonija „Majeveca“ pokazale je da pored Staroga grada i brojnih kulturno-historijskih spomenika, Srebrenik ima još mnogo toga važnog da pokaže svijetu“. Na otvaranju izložbe govorio je i direktor Turističke zajednice Nedret Fazlić, podcrtavši značaj i važnost Srebrenika u historiji Bosne i Hercegovine, te turističke ponude Tuzlanskog kantona. U znak zahvalnosti za podršku u organizaciji umjetničke kolonije Majeveca, Svjetlan Bešić je uručio poklon-slike nastale u okviru posljednje kolonije 2012. godine: direktoru turističke zajednice Nedretu Fazliću, načelniku općine Srebrenik Sanelu Buljubašiću, šefu Odjela za kulturu Vlade Brčko Distrikta BiH Jakovu Amidžiću, te glavnom i odgovornom uredniku portala: www.vodic.ba, Mehmedu Parganu. Osim što je Bešić veliki umjetnik on je i dobrotvor, tako da će jedna slika putem licitacije biti prodana a dobijeni novac će ići za nabavku stolica prilikom rekonstrukcije Gradskog stadiona u Srebreniku. U pauzi izložbe, polaznici Odjeljenja Osnovne muzičke škole pri Prvoj OŠ Srebrenik su se, izvedbom niza klasičnih muzičkih numera, predstavili brojnim posjetiocima .

40 godina postojanja i rada Narodne biblioteke Srebrenik



Dodjela nagrada najzaslužnijim pojedincima

Četrdesetogodišnjica postojanja i rada Narodne biblioteke u Srebreniku obilježena je 19.02.2013.g u prostorijama Doma kulture svečanom konferencijom. Konferenciji su prisustvovali bibliotekari iz Sarajeva, Bijeljine, Brčkog i Tuzle kao i bibliotekari sa našeg općinskog područja. Među prisutnim bili su i predstavnici svih škola sa područja općine Srebrenik, kao i mnogobrojni čitaoci biblioteke. Biblioteka je za 40 godina postojanja i rada najzaslužnijim pojedincima i kolektivima uručila zahvalnice. Zahvalnice su dodijeljene najaktivnijim čitaocima biblioteke, građanima i pravnim subjektima koji su poklanjali knjige biblioteci, kao i bibliotekarima, koji su svojim radom doprinijeli u razvoju BIS-a naše Općine. U nastavku programa obilježavanja jubileja biblioteke, upriličena je promocija romana „Samo priča“, zavičajnog pisca Rame



Promocija romana Rame Džombića Uče

Džombića Uče. Kako su istakli promotori profesori bosanskog jezika i književnosti, Sadil Mehmedović i Dževad Nuhanović te srebrenički književnik Kemal Nurkanović, ovaj roman, svojom kvalitetom, predstavlja veliki i značajan doprinos književnosti zavičaja i znatno šire. Istog dana u prostorijama Narodne biblioteke održan je i seminar za bibliotekare. Učesnicima seminara predavanja su održali: Enisa Žunić na temu: „Tendencije u savremenom bibliotekarstvu na teritoriji TK-a“; Dženana Tuzlak na temu: „COBISS“ i Midhat Sulejmanović na temu: „Program automatizacije rada u bibliotekama“. Dana 20.02.2012.g. takođe u sklopu obilježavanja navedenog jubileja, narodna biblioteka Srebrenik je upriličila i promociju knjige „Pjesme mog djetinjstva“. Autori navedene zbirke pjesama su 84-ro najmlađih čitaoca biblioteke, članova literarne sekcije biblioteke, koji su pisali u periodu od 1985-1990. godine i svoje radove ostavljali u biblioteci.



Predavači Midhat Sulejmanović i Dženana Tuzlak

Susreti planinara pod nazivom „Povelji u pohode“



Detalj sa susreta planinara

U okviru manifestacije "Dani povelje 2013", Planinarsko društvo "Majevice" Srebrenik je dana 17.02.2013.godine organiziralo susret planinara pod nazivom "Povelji u pohode". Preko 300 planinara, iz 9 društava sa područja čitave BiH, je, nakon čaja i časa historije koji im je upriličen na Starom gradu Srebreniku, prepješačilo stazu do Planinarskog doma Lipici. Na Planinarskom domu Lipici, na samom vrhu Majevice, nakon zasluženog ručka nastavljeno je cjelodnevno druženje.

Svečanom akademijom obilježen Međunarodni dan maternjeg jezika

U organizaciji BZK „Preporod“ Srebrenik, dana 20.02.2013. g. u prepunom Domu kulture u Srebreniku, upriličena je svečana akademija povodom obilježavanja „Međunarodnog dana maternjeg jezika“. Akademija je održana uz podršku učenika, nastavnika i menadžmenta Prve i Druge osnovne škole Srebrenik, Mješovite srednje škole Srebrenik, NTV Jata te Udruženja nastavnika i profesora bosanskog, hrvatskog, srpskog jezika i književnosti TK-a. Nakon prikazivanja filma o Starom gradu Srebreniku, autora Ibrić Amara iz Srebrenika, učenici od 1 do 4 razreda navedenih OŠ-a su na različitim



Održana je i izložba raznih knjiga i tekstova o bosanskom jeziku

svjetskim jezicima rekli „Dobar dan“, a u nastavku programa, prikazan je igrokaz u kojem su učenici predstavili kako su se jezik i muzika mijenjali kroz vrijeme. Akademija je nastavljena odličnom izvedbom pjesme „Crno i belo“ (Kaliopi) od strane Melike Moranjkić, učenice Prve OŠ Srebrenik, te nastupom sazlija, a završena je recitacijama i kratkim filmom o stećcima. Povodom ovog značajnog datuma u holu Doma kulture održana je izložba knjiga o gramatici i pravopisu bosanskog jezika, rječnik bosanskog jezika, raznih školskih udžbenika o bosanskom jeziku, te portofolia na kojima su polaznici literarne sekcije MSS Srebrenik prikazali tekstove napisane bosančicom i arabicom. Takođe je predstavljena i brošura „Slovo o jeziku“, koju su organizatori specijalno pripremili za ovu priliku.

Sajam pčelarstva i pčelarske opreme Srebrenik 2012

Dana 25.09.2012.godine, u organizaciji Udruženja pčelara „Roj“ Srebrenik, na gradskom šetalištu u Srebreniku otvoren je „Sajam pčelarstva i pčelarske opreme Srebrenik 2012“, na kojem je svoje proizvode predstavilo oko 30 pčelara iz BiH i



Pašezad Zukić sa nagradom za najbolji lipov med

Hrvatske. Četvrti po redu Sajam pčelarstva privukao je značajnu pažnju onih koji se profesionalno bave proizvodnjom meda, tako da je i ovog puta gradsko šetalište bilo u potpunosti u znaku slatkih pčelinjih proizvoda. Učesnike manifestacije ispred Udruženja pčelara „Roj“ Srebrenik pozdravio je Pašezad Zukić, a ovaj Sajam pčelarstva zvanično je otvorio načelnik općine Srebrenik Mehmed Bajrektarević,

naglasivši da resorna kantonalna i federalna ministarstva trebaju još značajnije stimulirati proizvođače meda i drugih proizvoda od meda, te time dati veći doprinos unapređenju domaće proizvodnje. Osim gostiju iz Gradačca, Tuzle, Janje, Brčkog, Žepča, Kalesije, Gunje (R. Hrvatska), Gračanice... zapažen nastup su imali i domaći proizvođači meda i pčelarske opreme. –I ova godina je za nas proizvođače meda bila veoma teška, prinosi meda su zbog hladnoće tokom proljeća te visokih temperatura i suše, koja vlada zadnjih gotovo 3 mjeseca, znatno umanjili tako da očekujemo pomoć viših nivoa vlasti, kako bismo opstali i zadržali broj pčelinjih društava bar na dosadašnjem nivou. Da se na ovim prostorima proizvodi kvalitetan med dokaz su brojne nagrade naših pčelara, između ostalog na 6. međunarodnom sajmu pčelarstva i pčelarske opreme i 4. ocjenjivanju meda, koje je održano 25.08.2012.g. u Brčko DC, moj med od lipe je osvojio Zlatnu medalju za kvalitet-istakao je Pašezad Zukić. Organizatori manifestacije, na osnovu ocjene stručnog žirija, su uručili nagrade za najuređeniji izlog, za najbolji literarni rad na temu pčelarstva i za najsladi med, a nagradu su ponijeli i najstariji i najmlađi izlagač. U sklopu ove manifestacije održan je i seminar za pčelare, na kojem su o zaštiti pčelinjih društava i prevenciji bolesti pčela govorili eminentni stručnjaci s Veterinarskog fakulteta u Sarajevu, te promocija 4. broja Pčelarskog lista, lista koji su pokrenula dva udruženja pčelara: „Roj“ iz Srebrenika i „Bagremovac“ iz Gračanice, dok je ovaj broj urađen od strane pčelarskih udruženja TK-a.

Dani polja hibridnog kukuruza 2012

Sredinom septembra 2012.g., u organizaciji Poljoprivrednog zavoda TK-a, u krugu Voćnog rasadnika u Špionici, održana je manifestacija „Dani polja hibridnog kukuruza 2012“. Uz predstavnike općinskih i kantonalnih vlasti, te predstavnike vodećih proizvođača sjemenskog kukuruza, manifestaciji je prisustvovalo i preko 100 poljoprivrednih proizvođača s područja sjeveroistočne Bosne. Učesnici manifestacije obišli su ogledno polje na kojem je proljetos zasijano 45 vrsta hibridnog kukuruza vodećih selekcionara „Instituta za ratarstvo i povrtlarstvo“ iz Novog Sada, Instituta za kukuruz iz Zemuna, „Pioneera“ iz SAD-a, „KWS“-a iz Njemačke, „Syngente“ iz Italije i „BC instituta“ iz Zagreba. Okupljeni poljoprivredni proizvođači imali su se priliku uvjeriti kako pojedini hibridi podnose ekstremne toplote i sušu, koja je posebno ove godine pogodila BiH, te koje vrste hibridnog kukuruza daju najbolje prinose u našim klimatskim uslovima. U razgovoru sa stručnjacima iz eminentnih svjetskih instituta za oplemenjivanje bilja, poljoprivrednici su imali priliku čuti i korisne informacije o najnovijim generacijama hibrida koje će im pomoći prilikom izbora sjemena kukuruza za predstojeću sjetvu. Susreti primarnih poljoprivrednih proizvođača, poljoprivrednih stručnjaka i predstavnika vlasti iskorišteni su i za razgovor o problemima koji prate ratarsku proizvodnju.



Ogledno polje sa 45 vrsta hibridnog kukuruza

Dani kruha i plodova zemlje 2012

Dana 02.09.2012.g. u Srednjoj Špionici kod Srebrenika, u organizaciji HKD Napredak – Podružnica Srebrenik, održana je šesta po redu tradicionalna manifestacija "Dani kruha i plodova zemlje". Na izložbenom prostoru našao se veliki broj tradicionalnih jela koja se spremaju od davnina, a prostor je



Predstavljena su brojna tradicionalna jela

bio uređen i dekoriran jesenskim plodovima zemlje. Manifestacija, čiji je cilj očuvanje kulture i tradicije ovoga kraja, okupila je veliki broj žitelja Špionice i Srebrenika, te je prešla lokalni karakter, postavši regionalna manifestacija. U kulturno umjetničkom programu nastupili su: HKUD "Husino" iz Tuzle, KUD "Napredak" iz Špionice i KUD "Mehmed Ibrahimović" iz Srebrenika te učenici područne škole iz Srednje Špionice. Na manifestaciji su bili prisutni i visoki predstavnici koji podržavaju projekte u općini Srebrenik kroz MDGF program Kultura za razvoj: ambasador Kraljevine Španjolske u BiH Alejandro Arvangonzales San Martin, rezidentni koordinator UN u BiH Yuri Afansiev, generalni konzul R. Hrvatske u Tuzli Josip Juras, ministar razvoja, poduzetništva i obrta Federacije BiH Sanjin Halimović, zamjenik ministra sigurnosti BiH Mijo Krešić, ministar poljoprivrede, vodoprivrede i šumarstva TK-a Išmir Škahić, načelnik općine Srebrenik Mehmed Barjektarević, predsjednik HKD- a Napredak prof. dr. Franjo Topić i mnogi drugi.

Rekonstruisan Gradski stadion u Srebreniku



Radove su pratili Sendić Bego, Alatić Kemal i dr. Suljić Zihir


Nakon što su prvi dio Premijer lige odigrali kao „domaćini“ na stadionu u Gradačcu, te da se to ne bi desilo i u proljetnom dijelu, srebreničani su krenuli sa rekonstrukcijom Gradskog stadiona. Radovi na izgradnji zapadne tribine su počeli krajem januara 2013.g, a na stadionu su često bili Sendić Bego i Alatić Kemal, predsjednik i potpredsjednik Uprave NK Gradina Srebrenik te dr. Suljić Zihir, koordinator radova postavljenog od strane općinskog načelnika Buljubašić Sanela. Izvođači radova iz srebreničke firme „Aksemont“ d.o.o. Srebrenik, su uspješno postavili metalnu konstrukciju zapadne tribine na prethodno pripremljene betonske stope. Kompletni radovi na zapadnoj tribini kapaciteta oko 200 navijača i ukupne vrijednosti oko 70.000 KM, su donacija od strane vlasnika navedene firme "Askemont" Alatić Kemala, inače velikog donatora i nadasve humanog čovjeka. –„Sve navedeno smo uradili u cilju ispunjavanja minimuma uslova kako bi zadovoljili kriterije koje zahtijeva NS BiH i kako bi naši nogometaši buduće utakmice

igrali u Srebreniku. Za ostvarenje tog cilja sam donirao metalnu konstrukciju tribine te rad mojih uposlenika i drago mi je što smo u tome i uspjeli“- istakao je Alatić. –„Osim radova na zapadnoj tribini završeni su radovi i na osposobljavanju svlačionica za gostujuće i domaće nogometaše, a izgrađen je i pristupni put od mosta u naselju Bare, pored gradskih bazena do Gradskog stadiona te parking prostor dimenzija 40x50m, a te radove je izvela firma „Jata“ d.o.o. Srebrenik. Na dobrotvornoj priredbi, kojoj su se odazvali brojni privrednici i građani, uspjeli smo prikupiti određena novčana sredstva te smo uspješno započeli i završili i rekonstrukciju istočne tribine, odn. zamijenili smo oko 1300 postojećih stolica sa plastičnim stolicama sa naslonom. Cijena jedne stolice je bila oko 20 KM, ali bez simpatizera Gradine koji su se naknadno uključili u ovu akciju, ne bismo uspjeli sve završiti do 25.02.2013.godine odn. do prvog domaćeg meča sa Sarajevom. Po izvršenom pregledu NS BiH je izdao potrebnu licencu za Gradski stadion u Srebreniku“-istakao je Suljić Zihir. Od tada naši nogometaši, koje čine uglavnom igrači koji su izašli iz mlađih kategorija Gradine, postižu znatno bolje rezultate, obzirom da su protiv favorizovane ekipe Sarajeva osvojili bod i nadamo se da se neće na ovome zaustaviti.



Novi izgled Gradskog stadiona u Srebreniku

IN MEMORIAM MUHAREMOVIĆ DR. HAŠIM 1937 - 2012



Prim. dr. Hašim Muharemović (1937 - 2012) foto: D. Imamović

Dana 18.09.2012.g., u 75. godini života, preminuo je jedan od najboljih balkanskih sazlija i poznavalaca sevdalinke prim. dr. Hašim Muharemović iz Srebrenika. Zbog srčanih problema posljednje dvije godine više nije nastupao ili je veoma rijetko nastupao na muzičkim pozornicama, na kojima je proteklih godina, zahvaljujući jedinstvenom načinu interpretiranja sevdalinke, stekao mnogobrojnu publiku. Dana 19.09.2012.g., nakon održane komemoracije, dženaza je, u prisustvu članova porodice, brojnih prijatelja, poznanika i ljubitelja njegovog lika i djela, krenula ispred Gradske džamije u Srebreniku i obavila se na mezarju u Donjem Srebreniku. Hašim Muharemović je po struci bio epidemiolog, ali je nadaleko bio poznat i kao odličan sazlija i vrsni poznavalac sevdalinke. Zbog toga je, osim na pozornici, radni vijek većinom proveo u Domu zdravlja u Srebreniku, odakle je i penzionisan. Autor je mnogobrojnih pjesama, među ostalima i čuvene "Sa Gradačca, bijele kule", koju mnogi smatraju narodnom pjesmom i po kojoj ćemo ga uvijek pamtit, kao i „Srebrenika nema do Travnika“ i brojnih drugih. Hašim Muharemović rođen je 22. marta 1937. godine u Srebreniku i između brojnih visokih priznanja posebno mu je bila draga Zlatna povelja, naznačajnije priznanje iz oblasti kulture na području Općine Srebrenik, koju je dobio u sklopu obilježavanja kulturne manifestacije „Dani povelje 2006“. Prim. dr. Hašim Muharemović bio je vodeći bh. sazlija i interpretator sevdalinki, a pored toga i vrsni slikar, pjesnik, sakupljač narodnog blaga... Svi znamo da je prekrasno pjevao i svirao i bilo je zadovoljstvo proteklih godina imati dr. Muharemovića u svom gradu, dijeliti s njim dobro i zlo. Otišao je tiho i nenametljivo, kako je uostalom i živio.

Hadžić Mineli srebro sa Svjetskog prvenstva u karateu

Karatiskinja KK „1. Mart“ iz Srebrenika Minela Hadžić, na WUKF Svjetskom prvenstvu u karateu za djecu, kadete i juniore, održanom od 10. do 14. oktobra u Novom Sadu, osvojila je srebrnu medalju. S obzirom da je na prvenstvu učestvovalo 2.500 takmičara iz 56 reprezentacija, ovaj uspjeh naše reprezentativke ima još veću vrijednost. –Medalju sam osvojila u ekipnoj konkurenciji u kategoriji kadetkinja (15-17 godina), a sa mnom su još bile Žaklina Matić, Lejla Softić i Adela Memić, gdje smo do finala bile bolje od Poljske, Rumunije i Engleske, kaže Hadžićka. Ova medalja ima posebnu vrijednost s obzirom što je prva koja je osvojena na Svjetskom prvenstvu, iako je do sada osvojila više od 300 odličja na raznim takmičenjima, među kojima posebnu vrijednost imaju one sa Evropskog Super kupa iz Subotice.



Hadžić Minela na svjetskom prvenstvu u Novom Sadu

Božićni malonogometni turnir 2012.g. osvojila ekipa „Aksemont“

Ekipa "Aksemonta" pobjednik je tradicionalnog malonogometnog Božićnog turnira koji je, u organizaciji NK "Frankopan" iz Špionice, održan krajem decembra 2012.godine u Sportsko rekreativnom centru u Srebreniku. Oni su u finalu bili bolji od ekipe "Džindo" iz Doborovaca, dok je u duelu za treće mjesto ekipa "Čato" iz Sladne bila uspješniji od ekipe "Jarani" iz Gračanice. Za najboljeg igrača turnira proglašen je Elvedin Aletić iz "Aksemonta", koji je ujedno i najbolji strijelac, zajedno sa Zijadom Ahmićem iz ekipe "Čato", dok je najboljim golmanom proglašen Mirsad Avdić. Najboljim ekipama uručeni su prigodni pehari i diplome te vrijedne novčane nagrade u ukupnom iznosu od 1.350 KM.



Pobjednička ekipa Aksemonta



Trenutak dodjele Plakete Mineli Hadžić

Za navedeni, kao i zbog brojnih drugih uspjeha, Minela Hadžić je dobila od Karate saveza FBiH Plaketu za vrhunske rezultate u 2012. godini. Na karate turniru u Tuzli, u ime Karate saveza FBiH, ovo priznanje uručio joj je Mujo Gec, kojom prilikom je pohvalio ovu sportiskinju iz Srebrenika te istakao kako je ona u 2012. g. osvojila ukupno 55 medalja.

Najbolji sportisti općine Srebrenik u 2012. g.

Na izboru najboljih sportista općine Srebrenik za 2012. godinu, koji je održan u organizaciji Sportskog saveza Općine Srebrenik, za najbolje sportiste izabrani su karatiskinja „1. Marta“ **Minela Hadžić** i košarkaš „Gradine“ **Ishak Hasić**! U kategoriji nogometa najboljim kadetom proglašen je fudbaler „Ingrama“ Elmir Karić, najjunior i senior su iz OFK „Gradine“ i to Emil Tursunović odnosno Damir Smajlović, Maksida Islamović je najbolja nogometašica, dok je najbolja ekipa O.F.K. „Gradina“. Iz reda dvoranskih sportova najboljom



Najbolji sportisti sa načelnikom Buljubašić Sanelom

kadetkinjom je proglašena Mirela Hodžić, košarkašica „Fenixa“, najkadet je Adnan Bećirović iz „Silver kingsa“, najbolji junior je Edin Avdić iz istog kluba, a u seniorskoj konkurenciji Ishak Hasić košarkaš „Gradine“, dok je najboljom ekipom proglašen Košarkaški klub „Gradina“. U kategoriji karatea, najbolji pioniri su iz kluba „1. Mart“ i to Elma Muratović i Almir Pjević, a najbolji juniori-senior su Amir Arifović iz Karate kluba „Srebrenik“ te Minela Hadžić iz kluba „1. Mart“. Sportski savez je dodijelio i posebna priznanja i to Nijazu Arnautoviću (za razvoj karatea), Edhemu Husariću (razvoj fudbala), Aliji Škahiću (doprinos u razvoju fudbala), Murselu Deliću (razvoj košarke), Adeli Joldić (razvoj tenisa) te posthumno Nuraqi Huseinoviću.